

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-05791-2010
Broj akta: 01EH-001
Gračanica, 31. 08. 2010. godine

Z A P I S N I K
SA TEMATSKE SJEDNICE OPĆINSKOG VIJEĆA
GRAČANICA

Održane dana 01. 07. 2010. godine u Dershani Osman-kapetanove medrese u Gračanici sa početkom u 14.00 sati.

Početak sjednice prisustvovalo je 26 članova Općinskog vijeća Gračanica. Odsutni su: Džananović Asim, Šuša Ersan, Huskanović Elvira i Bajraktarević Avdo.

Tematsku sjednicu je zakazao i istom predsjedavao Muharem Musić, predsjedavajući Općinskog vijeća Gračanica, zajedno sa zamjenikom Seadom Gazibegović i sekretarom Zehrom Mujačić.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća sjednici su prisustvovali i: Općinski načelnik Nusret Helić, šefovi službi za upravu Aida Hodžić, Zijad Dedić i Mustafa Bajić, općinski pravobranilac Jasminka Imširović, gosp. Amer Džindo, predsjednici VMZ-a Pribava, Gornji Doborovci, Miričina, Vranović, Donja Lohinja, Stjepan Polje, Babići, Gornja Orahovica, Buk, Džakule i Doborovci, koji nisu i članovi Općinskog vijeća, te predstavnici sredstava informisanja.

Predsjedavajući Vijeća je otvorio sjednicu i predložio sljedeći

D N E V N I R E D:

1. IZVJEŠTAJ O PROCIJENJENOJ ŠTETI OD PRIRODNE NEPOGODE KOJA JE UZROKOVALA POJAVU POPLAVA I KLIZIŠTA NA PODRUČJU OPIĆNE GRAČANICA U PERIODU 31. 05. – 11. 06. 2010. GODINE I 21. 06. -28. 06. 2010. GODINE

Odmah se krenulo sa radom.

TAČKA 1.

Uvodno obrazloženje Izvještaja dao je šef Službe za civilnu zaštitu Mustafa Bajić:

“Ja ću u kratkim crtama jedno obrazloženje vezano za ove prirodne nepogode koje su pogodile područje općine Gračanica od prvog juna i zaključno sa dvadeset osmim junom, iako je još uvijek stanje prirodne nepogode od klizišta. Uredbom o jedinstvenoj metodologiji za procjenu šteta prirodnih i drugih nesreća utvrđena je metoda i način utvrđivanja šteta koje nastanu na materijalnim i drugim dobrima izazvanim djelovanjem prirodnih i drugih nesreća predviđenih Zakonom o zaštiti i spašavanju ljudi i materijalnih dobara od prirodnih i drugih nesreća. Procjena šteta je potrebna radi sagledavanja ukupne štete, vrsta štete, subjekti koji su pretrpjeli štetu i visini pretrpjele štete i ovi podaci su ovdje za rješavanje četiri osnovna pitanja.

Da se utvrdi ukupna šteta koja je nastala djelovanjem prirodne i druge nesreće, da se utvrde subjekti koji su pretrpjeli štetu, fizička i pravna lica i druge institucije, zatim u čemu se šteta sastoji i njena visina, da bi se mogla tražiti određena pomoć za sanaciju nastalih posljedica ako se procijeni da je pomoć potrebna. Na osnovu analiza uzroka nastalih od prirodnih i drugih nesreća predviđena je dogradnja određenih pitanja u svrhu preventivne zaštite. Općinska komisija za procjenu šteta na području općine Gračanica uradila je Izvještaj o procijenjenoj šteti od prirodne nepogode koja je uzrokovala pojavu poplave i klizišta na području općine Gračanica u periodu od 31. 05. 2010. g. do 11. 06. 2010. godine u kojem su evidentne štete i to: plavljenje 230 hektara poljoprivrednog zemljišta, plavljenje 120 stambenih objekata, 8 proizvodnih pogona, aktiviranje 60 klizišta i odrona gdje su oštećene dvije lokacije na regionalnom putu, oštećenja na 9 lokalnih puteva, oštećenja na 4 stambena objekta, oštećenja na svim makadamskim putevima na području općine i ugrožena 4 stambena objekta i 6 lokalnih puteva. Ukupna procijenjena šteta iznosi 4.378.540,67 KM, a za sanaciju klizišta u budžetu Općine i zajedno sa sredstvima posebne naknade za zaštitu i spašavanje su minimalna i nisu dovoljna za saniranje šteta, tako da je Općina uputila Vladi TK zahtjev za dodjelu jednokratne pomoći za saniranje šteta. Tom prilikom od Kantonalnog štaba CZ TK Tuzla iz sredstava posebne naknade dodijeljeno je 10.000,00 KM i od direktora Federalne uprave CZ i sredstava posebne naknade kojim raspolaže Federalni štab CZ, kao hitna intervencija koju može dodijeliti direktor, dodijeljeno je 10.000,00 KM. Sredstva od Kantonalnog štaba civilne zaštite su danas doznačena dok od Federalne uprave civilne zaštite još uvijek nisu doznačena. Nova prirodna nepogoda od poplave i klizišta 22. 06. 2010. godine prouzrokovala je štete na stambenim, ekonomskim, poslovnim i infrastrukturnim objektima kao i poljoprivrednim kulturama što je dodatno stvorilo probleme za otklanjanje posljedica od poplave i klizišta. Ukupna šteta iznosi 1.387.267,72 KM i od toga 513.150,00 KM odnosi se na hitne sanacije na klizištima i infrastrukturi. Stvarna šteta je mnogo veća obzirom da su sva klizišta uslovljena izradom projektne dokumentacije i sanacija po projektu. Pored rijeke Spreče skoro svi lokalni vodotoci su se izlili iz svog korita, a najteže stanje procijenjeno je u Donjoj Orahovici, Lukavici, Gračanici, Pribavi i Lohinji. Od posljedica izlivanja lokalnih vodotoka, izlivanja iz svog korita, klizišta su se aktivirala u skoro svim mjesnim zajednicama tako da je zaključno sa 28. 06. 2010. godine aktivirano novih 82 klizišta, koja su ugrozila stambene i infrastrukturne objekte na području općine Gračanica što ukupno sa prethodnim iznosi 142 klizišta i odrona. Za stručnu pomoć kod procjene šteta, Općina Gračanica je angažovala magistra Džindo Amera koji je dao prijedlog hitne mjere sanacije klizišta kojima su oštećeni i ugroženi objekti i putevi. Za hitnu sanaciju puteva i obezbjeđenja prohodnosti što je prioritet Općina nema adekvatnih sredstava i zatražena je pomoć od Vlade TK i Vlade FBiH. Ako izostane pomoć viših nivoa vlasti Općina će doći u bezizlaznu situaciju po pitanju nužne i hitne sanacije klizišta i odrona. Sa ovog vijeća očekujemo i zaključak, poruku Općinskog vijeća, a što je i zakonska obaveza da se poslovnima zaštite i spašavanja moraju baviti svi subjekti društva, građani, pravna i fizička lica, organi vlasti i druge institucije i da su najodgovorniji za provođenje preventivnih operativnih mjera zaštite na svojoj imovini, što je u većem dijelu izostalo. Od strane Općinskog štaba civilne zaštite upućene su naredbe o angažovanju nekoliko preduzeća na hitnoj i nužnoj sanaciji klizišta i odrona. U MZ-i Malešići-Golaći Gračanica, Korića Han, Prijeko Brdo put Trnovci Prijeko Brdo, Donja Orahovica sanacija oštećenja na kanalizacionom sistemu koji plavi 50 stambenih objekata, sanacija regulacije rijeke Sokoluše, sanacija klizišta u Dobrnjićima u Gornjoj Orahovici, sanacija klizišta u Lendićima, dvije lokacije gdje su oštećeni stambeni objekti, sanacija klizišta i odrona u MZ-i Lukavica. I ako izostane pomoć od viših nivoa upitno je kako isfinansirati sve ovo. Predlažemo općinskom vijeću Gračanica da za naredni budžet za 2011. godinu planira veća sredstva za preventivne mjere, klizišta, otklanjanje posljedica prirodne nepogode i veća sredstva budžetske rezerve kako bi Općinski načelnik imao ovlaštenje i mogao interventno djelovati. Predlažemo Općinskom vijeću Gračanica da navedeni izvještaj usvoji kako bi uputili zahtjev višim nivoima vlasti za traženje pomoći za sanaciju šteta, posljedice prirodne nepogode.”

Vijeću se obratio i magistar Amer Džindo:

“Evo prije svega da pozdravim sve prisutne, da se zahvalim na ovom pozivu da prisustvujem ovoj sjednici iako bih ja lično volio da je ona povodom nekih ljepših zbivanja i događaja. Međutim, vrijeme koje je pred nama očito sprema nova iznenađenja, pogotovo odnos čovjeka i prirode i sve ono što smo mi godinama prema prirodi negativno djelovali sad nam se na neki način vraća s daleko većim kamatama. Mogu vam reći da u ovo nekoliko dana intenzivnog obilaska klizišta, jer sam bio na preko 40 lokacija, ono iskustvo koje sam stekao 2001. godine vodeći kantonalne i općinske štabove na hitnim intervencijama je za mene poražavajuće. Ja sam mislio da nam se 2001. zadugo neće vratiti, međutim ova 2010. stručno, lično i moralno stojim da je daleko gora sa daleko većim posljedicama, sa ranama koje će tek kasnije sa sobom donijeti nove posljedice. Imamo veliki broj aktiviranih klizišta koja su velikih razmjera sa zadobijenim ranama, što bi mi rekli, koje će se tek u narednih par godina osjetiti i na infrastrukturi ili linijski, saobraćajnicama, vodovodima, kanalizacijama, telefonijama i slično ili na objektima. Međutim, imamo to što imamo i imamo jednu ogromnu pozitivnu energiju da pomognemo tamo gdje je moguće pomoći i da interвениšemo na onim mjestima gdje struka kaže da je logika intervenirati. U tom smislu smo dali par tehničkih savjeta da se reaguje tamo gdje očekujemo da će ta reakcija imati pozitivan efekat i gdje ćemo za relativno mala finansijska sredstva uspjeti da makar zaštitimo neke vitalne infrastrukturne objekte, saobraćajnice prije svega, ali i da spriječimo neke daleko neželjenije posljedice koje poslije ovog svega mogu da nastanu. Činjenica je da očito naše društvo ima dosta manjkavosti i u zakonskoj regulativi i u odnosu pojedinca i prema vlastitoj imovini a pogotovo prema društvenoj. Iznenađuje mene lično, a to me iznenađivalo i 2001. godine i 1998. i svih ovih godina dok sam radio prije rata u Sarajevu, taj nekakav inferioran odnos našeg čovjeka prema onom svemu što se dešava. Ne možemo samo čekati da neko u ime nas preuzme neke korake. Moramo i mi sami preduzeti mali korak ako očekujemo od nekog da preduzme veliki. Znači, prije svega imamo moralnu obavezu da apeliramo sve građane da shvate ozbiljnost situacije i svako u domenu vlastitih mogućnosti preduzme bar neke skromne mjere samozaštite i vlastite imovine, ali isto tako i imovine prvog komšije, naselja, mjesne zajednice itd. Prema tome, sjedeći i gledajući kako nove količine vode ulaze u klizno tijelo a ne uzeti lopatu i preusmjeriti taj potočić u neku drugu stranu po meni je pomalo i opstrukcija u cijelom ovom slučaju. Gdje god sam bio svim građanima koji su bili zainteresovani da saslušaju, par savjeta sam dao, šta se može uraditi. Imamo apsurdna, ljudi kažu nama su rekli da mi to pokrijemo najlonom i onda sam ja pitao šta ste time dobili, sakrili ste problem od očiju. Najlon se stavlja samo u trenutku kad očekujemo neposredne padavine a pukotine u kliznom tijelu su nam otvorene. Padavine prolaze, najlon se skida da se tlo može isušivati, da možemo prići fizički zatvaranju tih pukotina, preorijentisati kanale, napraviti im neke nove trase, preraspodijeliti zemljane mase i pokušati sami da postignemo nešto malo i u nadi da će se naći dovoljno sredstava da Općina, Kanton, Federacija i bilo ko drugi interвениše i pomogne. Ova sredstva što je gospodin iz Civilne zaštite iznio, ja bih volio da mogu reći da su realna. Međutim, evo da uzmemo jednu prostu računicu. Svako klizište malih razmjera za svoju ograničenu sanaciju, znači ne potpunu, na našem tržištu vrijedi cca 50.000,00 KM. Imamo 142 lokacije klizišta puta to para je preko sedamstohiljada KM za ograničene intervencije. I mi pričamo o klizištima čije samo posmatramo refleksije. Klizište je veliki prostor, složenog mehanizma i mi vidimo refleksiju samo u prekinutom putu, puknutoj kući, prekinutom vodovodu, oštećenom rezervoaru i slično. Razmjere u prostoru su mogu vam reći frapantne. Inače općina Gračanica ima vrlo nepovoljnu morfologiju, znači imate sigurno 70% površine koja spada po svim kategorijama u labilnu i nestabilnu kategoriju terena. Znači, nešto što je već prirodno predisponirano raznim oblicima nestabilnosti. Svako uljepšavanje izvještaja ili ove moje izjave što vam sad govorim bi bilo i nekorektno i nerealno. Ja bih volio reći da vas očekuju neka bolja vremena, međutim ono što iz dana u dan, a evo i danas sam direktno sa terena došao ovamo, su sve gore i gore stvari, nažalost i kad mislimo da je kiša prestala pa se nadamo da će doći do smirenja, međutim u ovoj tkz. šok terapiji usljed temperaturnih oscilacija tlo doživljava unutrašnje preraspodjele napora koji mi ne vidimo ali svaka nova kiša iza dva tri sparna topla dana predstavlja novu katastrofu i

novo pokretanje masa. Ako u toku sjednice bude nekih pitanja ja stojim na raspolaganju, jedino mala ispravka, valjda svi vole zvati profesor zato što su profesori stalno dolazili na ova područja, ja sam titulom magistar Amer Džindo, uža specijalnost inženjerska geologija i još uža specijalnost klizišta i čitav svoj radni vijek sam proveo sa tim problemima, ostavio neke tragove i ono čime se ja bavim to su te interventne sanacije, odnosno ono kad nemamo vremena čekati projekte, istraživanja, nego moramo u trenutku reagovati da spriječimo dalje neželjene posljedice, iskoristimo dosadašnja stečena znanja struke i nauke, pokušamo ih primijeniti na konkretnom problemu. Ako uspijemo svi smo zadovoljni, ako ne uspijemo zna se ko je kriv, govornik koji je pred vama i onda je lakše. Ali stvarno imamo jedan ogroman problem, i ne samo vi, ja sam u kontaktu sa svojim kolegama iz Tuzle. I tamo je stanje isto alarmantno, jednostavno se više ne zna šta da se radi i šta je to novo što nas sve čeka. Hvala vam za pažnju, mi nastavljamo dalje raditi, a ne znam ni kad ćemo završiti. Toliko je toga pred nama, pokušavamo nešto da uradimo ali shvatite da sa ovo sredstava ništa pametno se ne može uraditi.”

U toku izlaganja magistra, sjednici je pristupila i Elvira Huskanović pa je prisutno 27 članova Vijeća.

Učesnici u raspravi su:

Rabija Fišić:

“Gospodin Amer Džindo je dao dobar uvod i na osnovu svega ovog mi se stvarno moramo uplašiti i početi na drugačiji način razmišljati i odnositi se prema očuvanju okoline. Kako kažu, priroda je jako dobra kako se mi odnosimo prema njoj. Što se tiče Izvještaja o procjeni šteta, on je urađen po pomenutoj metodologiji i jako je dobar sa moje tačke gledišta. Međutim, visina šteta je sigurno još i mnogo veća zato što se nije moglo ući u sve parcele. Velike štete jesu na putnoj infrastrukturi i na građevinskim objektima, ali pošto sam ja u poljoprivredi, mogu reći da su ogromne štete i kad je u pitanju poljoprivredna proizvodnja. Recimo, pojedine kulture na ovim dijelovima gdje je bilo poplavljeno i tri puta su se presijavale. Kukuruz se tri puta sigurno presijavao dole u Sprečkoj dolini, kao i druge poljoprivredne kulture, a indirektno štete će se kasnije odraziti na poskupljenju ovih poljoprivrednih proizvoda, zatim nedostatku stočne hrane, a samim tim će se sigurno smanjiti i stočni fond. Sem štete od poplava koje su se desile, štete su na poljoprivrednim kulturama nastale takođe i pojavom niskih temperature koje su se desile u toku mjeseca maja i juna. Stoga mogu reći da smo mi na pojedinim mjestima krastavac presijavali i po tri puta, a u to je uloženo preko 200.000,00 KM. Zato mogu reći da su poljoprivredni proizvođači u ovoj godini u jako teškom položaju na području općine Gračanica kao i šire. Smatram da mimo kantonalne i federalne vlade koje izdvajaju i moraju izdvajati sigurno i veća sredstva i u budžetu naše općine ubuduće moramo veća sredstva izdvajati kako za podsticaj u poljoprivredi tako i u ove fondove zaštite od elementarnih nepogoda. I na kraju ću opet da pomenem, kako se ljudi odnose prema prirodi, priroda nam stvarno malo vraća. Isto tako želim reći. Zašto već stvarno ne počnemo razmišljati o rebalansu budžeta jer će nam faliti para, a znam da i trenutno fali što se tiče punjenja budžeta, manje se puni u odnosu na plan, ali će faliti da pomognemo ovim ljudima koji su stvarno u vrlo teškom položaju.”

Rukib Džananović:

“Ja sam se javio da samo kažem u ovom dijelu, da MZ-a Gornji Doborovci se ne nalazi uopšte ovdje u ovom spisku mjesnih zajednica poredanih, pa bih napomenuo da to ima u vidu i gospodin Bajić. Mi gore imamo na regionalnom putu dva klizišta. Ona su sigurno evidentirana, ali da se zna, jer jedno klizište prijeto i jednoj kući. Ja sam rekao tamo i ime o kome se radi, jer me taj čovjek stalno zove i pita ima li šta ili ne. Bitno je da se evidentira i da se postupi u neakvim mogućnostima. Ima još dva slučaja na lokalnim putevima u MZ-i, to su put Džanani-Hodžići, imamo klizište koje je načelo asfalt i put Džanani-Serhatlije-Prijeko Brdo na jednom

mjestu pojavilo se klizište. To je sada u ovom zadnjem vremenu, što se tiče onog prvog izvještaja nemam tu šta dodati.”

Džemal Jukan:

“Evo kako reče komandant Civilne zaštite, otprilike ja sam shvatio našu ulogu danas ovdje. Mi bi trebali prihvatiti ovaj izvještaj i ovu procjenu i s ovog mjesta uputiti zahtjev, odnosno vapaj za pomoć višim nivoima vlasti. Kako reče komandant Civilne zaštite, ukoliko izostane ta pomoć Općina će se naći u bezizlaznoj situaciji, odnosno bit ćemo prepušteni sami sebi. Sve je upitno i pominjemo neki novi budžet, ako ne daj Bože opet dođe do nečeg sličnog da imamo više toga u rezervi, da imamo više planiranih budžetskih sredstava u ove namjene. Ja se pitam da li je to dovoljno i da li je to to što mi možemo uraditi. Mi smo juče imali ovdje jednu tačku dnevnog reda i nju smo usvojili, a radilo se o putnoj infrastrukturi na nivou Općine, odlučili smo da se može Općina zadužiti i uraditi i sanirati neke puteve. Stavili smo ih u prioritet. Danas imamo podatke ovdje da se do pojedinih mjesnih zajednica ne možemo doći, da pojedini dijelovi mjesnih zajednica vjerovatno, autobus i saobraćaj potrajat će mjesecima da se to sanira i napravi. I vraćam se opet na početak, ako viši nivoi vlasti na pomognu i ne urade, vjerovatno će to sve ostati za neka bolja vremena. Zato sam juče bio suzdržan prilikom donošenja Odluke o zaduženju Općine jer sam smatrao da putnu infrastrukturu trebamo razmatrati kompletno na općini ne računajući i ovo o čemu danas raspravljamo. Samo za putnu infrastrukturu ovdje stoji da su štete oko dva miliona KM. Naravno da ne može Općina reagovati da to sanira, ali isto tako je normalno da ne možemo očekivati neku značajniju pomoć od viših nivoa vlasti, znajući situaciju koja jeste i nije realno da očekujemo da nam neko da milion ili dva kako bi to mogli blagovremeno sanirati. Zato mislim da dijelom, ovo što je najugroženije, tamo gdje se ne može doći i proći da bi se mogla naći sredstva pa neka su to sredstva u visini Odluke koju smo juče donijeli da se zadužimo, da se te mjesne zajednice spoje da mogu komunicirati sa centrom općine, a ono što smo odlučili juče da asfaltiramo neke da se povežu sa magistralim putem, možda to u ovom trenutku može biti i u drugom planu.”

U toku diskusije sjednici je pristupio i Avdo Bajraktarević tako da istoj prisustvuje 28 članova Vijeća.

Hasan Puškar:

“Kolega, mi smo ovaj izvještaj imali i juče prije usvajanja Odluke o zaduženju. Ja bih ovdje samo postavio pitanje da mi se objasni kao predsjedniku VMZ-e. Kaže ovako: Općinski štab civilne zaštite dostavlja naredbu VMZ-e za preduzimanje mjera zaštite i spašavanja, pa član 1. “naređuje se predsjednicima VMZ-a na području općine Gračanica da zbog situacije koju je uzrokovala poplava i klizišta u mjesnim zajednicama u saradnji sa građanima organizuju rasijecanje, iskope i slično, te čišćenje korita. U koritu vodotoka izvršiti čišćenje, osijecanje staba koja onemogućavaju protok vode i sve podatke po uzupiranim površinama uz vodotoke od strane građana, pravnih lica sa svim podacima pismeno prijaviti nadležnoj službi Općine za uzurpacije.” Znači pitanje je, angažujemo mi građane, ko plaća angažman, kome se dostavlja račun itd. Izašlo pedeset ljudi ko će platiti te ljude? Drugo, konkretno pitanje. Šta ćete poduzeti konkretno u vezi uzurpacija, a ne da se samo dopisujemo? Imamo mi tih dopisivanja previše, konkretno šta ćete preduzeti u vezi uzurpacija uz vodotoke i kome ćemo se konkretno obratiti, imenom i prezimenom za zasipanje tih vodotoka, zakrčivanje vodotoka i slično, hoće li neko nešto nekad konkretno poduzeti, ali konkretno? Evo ovdje ima dvadesetak predsjednika VMZ-a koji svi imaju tih problema, a hoće li neko više dobiti neku prijavu, kaznu. Ko će očistiti to, pa neka se fakturiše tom građaninu koji je to uradio. Hoću konkretan odgovor jer nas sve, većinu to interesuje. Za klizišta su većinom krivi građani.”

Rahim Gadžić:

“Zahvaljujem se na pozivu za današnju sjednicu. Mi smo na jučerašnjoj sjednici Vijeća, na inicijativu Kluba vijećnika SDA zakazali danas ovu sjednicu vezano za posljednja dešavanja

od klizišta i poplava na općini Gračanica. Izvještaj kao izvještaj je lijepo napisan, obrađen, izašlo se na teren, ustanovljeno je. Međutim, danas ne bi trebalo biti jedna sjednica da se ispričamo i da od toga ne bude ništa. Ovdje su odgovorni ljudi, načelnik, Općinsko vijeće, predsjednici VMZ-a, svi koji nešto odlučuju. Treba se konkretno dogovoriti. Učešća treba uzeti i Općina. Ne možemo mi očekivati samo da nam neko drugi dođe i završi posao a da mi sjedimo. Za vrijeme poplava sva su se VMZ-a uključila da se spasi ono što se može spasiti. Moramo iznaći neka sredstva iz općinskog budžeta, mogu se iznaći ta sredstva, nije bio rebalans budžeta i na narednom rebalansu budžeta sva ona sredstva koja se utroše na sanacijama mogu se iznaći iz budžeta. Ako budemo čekali da nam samo dođu sredstva iz Kantona i Federacije, vjerovatno ovi putevi, mjesecima će građani čekati da putevi budu prohodni. Znači danas treba razgovarati oko konkretnih stvari i zaključaka sa ove sjednice, da se izvede zaključak, a ne da odemo nakon što se ispričamo, sanirat će se a da ne znamo. Znači treba se tačno dogovoriti kada će krenuti sanacija i da li je ovo dovoljno sredstava ili nije, imaju li prioritete. Moramo poredati prioritete u sanacijama, vidjeti koji su to glavni putevi, koliko šta treba pa uključiti i MZ-e, svi da uzmemo učešća ali samo da nađemo rješenje, da razriješimo prohodnost puteva.”

Mirnes Ahmić:

“Evo ovdje moji prethodnici su mnogo toga rekli i ja sam na tom fonu da mi previše apelira upućujemo višim nivoima vlasti da nam pomognu. Mislim da mi ovdje danas moramo iznaći određena sredstva da se ona područja koja su najugroženija klizištima i odronima, da se saniraju. Iskreno rečeno ja sam očekivao i prije vanrednu sjednicu Općinskog vijeća, obzirom na informacije kojima raspolazem, da su sve općine koje su proglasile stanje elementarne nepogode održale vanredne sjednice vijeća i izdvojile određena sredstva koja su stavili na raspolaganje štabovima civilne zaštite za hitne sanacije. Evo znam u Gradačcu da su izdvojili 100.000,00 KM, Srebreniku 100.000,00, 150.000,00 KM ne znam tačno i mislim da se time moramo rukovoditi i mi danas. Normalno treba uputiti zahtjeve i višim nivoima vlasti ali mi moramo krenuti ispred sebe. Slažem se sa ovim što je kolega Jukan govorio, znači juče smo donijeli jednu odluku da se zadužimo da asphaltiramo određene puteve, neću ulaziti u to je li to predizborna ili nije ali mislim da i ova situacija koja nas je zadesila kad su u pitanju klizišta, odroni i poplave, moramo iznaći adekvatno rješenje i naći novčana sredstva da se najugroženija područja saniraju. Isto tako kad je u pitanju ovaj izvještaj komisije, komisija je sačinila izvještaj o procjeni šteta i mislim da on nije obuhvatio sva područja, obzirom da nisu evidentirana sva klizišta i evo predsjednici MZ-a vjerovatno će iznijeti još određena klizišta sa kojima oni raspolazu, a ja ću evo predložiti zaključak da se sva ona klizišta koja se nisu uvrstila u ovaj izvještaj da se uvrste. Ja sam juče postavio pitanje vezano za to i sam rad ove komisije i nažalost možda sam naišao i na neka negodovanja i sve, ali evo ja sam preko službe gosp. Dediću navodio primjer kod Vranovića i komisija koja je izlazila u MZ-i Vranovići već je evidentirala klizište na putu za Vikale, dvije lokacije. Koliko je to komisija dobro radila, ja ću reći da postoje dvije lokacije puta za Vikale, ali to se nalazi pet, odnosno četiri kilometra daleko od Vranovića u MZ-i Sladna, općina Srebrenik. To je vjerovatno uzrok tome, što su prema mojim informacijama radili ne koordinirajući sa VMZ-a. Znači tu komisija je pitala ljude koji su se vraćali sa dženaze i odnekle iz Sladne i prijavili tamo puteve u Vikalima. Evo ja se nadam da će predsjednik VMZ-e Vranovići iznijeti još podatke za nekolicinu klizišta koja nisu evidentirana, koja nisu u ovom izvještaju. I još bih nešto kazao, a vezano je za nadležnost. Ovdje kad mi interвениšemo iz MZ-e, mislim da se ovdje neke nadležnosti ne slažu, jedni kažu da je nadležna neka komisija, drugi Civilna zaštita, tako da mi nemamo neke prave činjenice ni kome da se obratimo. Mislim da ovu naredbu koju je Općinski štab donio i komandant štaba potpisao, mislim da se time neće problem riješiti, a evo i kolega Puškar je govorio, vjerujte da je veoma teško angažovati ljude da rade bez ikakve naknade i teško je za to angažovati ljude na terenu da bilo šta urade. Vijeća MZ-a su u skladu sa svojim mogućnostima preventivno djelovala negdje gdje se to moglo uraditi, ali mislim da moramo naći bolji mehanizam, a ova naredba neće tome pridonijeti, jedino ako se odgovornost

pokušava prebaciti na VMZ-e i mislim da to nije uredu. Ovdje imaju ljudi koji su plaćeni i da trebaju raditi svoj posao.”

Sead Gazibegović:

“Sve je ovo uredu što se tiče ovih diskusija, ali mi moramo imati neke konkretne stvari i konkretne planove da bi mogli početi nešto raditi. Znači, na osnovu ovih izvještaja i na osnovu saznanja koja će stići, trebamo uraditi listu prioriteta. Šta je to što se mora uraditi. Meni je jasno da je svakom njegova muka veća, najteža. Kome god je krenulo klizište u njivi, pa neće sutra moći kositi, to je problem i on će s tim doći kao sa najvećim problemom. Jasno nam je, ako sve bude problem, ako sve bude u prioritetu da nećemo sigurno ništa uraditi, samo ćemo se vrtiti u krug. Znači morala bi neka komisija, da li ova da li još proširena, uraditi listu prioriteta i reći u toj MZ-i se mora nasuti 50 metara puta, toliko i toliko para, da bismo mi mogli, ako Općina, a mora učestvovati lokalna zajednica jednim dijelom, da bar za taj dio znamo. Znamo pristupamo rebalansu budžeta, pristupamo donošenju odluke da se neka sredstva izdvoje, da znamo okvirno koliko je to i šta se za to može uraditi. Dalji problemi koje mi ovdje imamo, možda odgovor, ustvari ovo pitanje kolege Puškara ko će platiti ljude koji će se organizovati, sad je, ustvari krije glavni problem, suštinu, čujte, ko će platiti ljude? Mi smo ti isti ljudi, mi smo zatrpali sve te kanale, uradili smo to i to, kad je poplavljeno mi se izmakli i rekli načelniče dođi da mi otkopaš ovaj kanal, a ti sjediš i čekaš. Ja mislim da tako vjerovatno ne može, jer kad kuća gori da li mi pitamo kako ćemo platiti ljude koji treba da dođu da gase požar. Svakako potpuno se slažem sa ovim konstatacijama da mjere represije moraju krenuti puno jače spram ovih koji, kako kome padne na pamet zakopa brdo pa vozi kamen i zemlju, kako kome služi korito u rijeci i potoku, pravi nekakve interne brane i na to sam nailazio da ima i ako mi to samo konstatujemo i ponovo pređemo preko toga mi ćemo hiljadugodišnje vode doživljavati u sto godina, stogodišnje u deset a desetogodišnje svake godine i to će tako biti pa onda nam je džaba pitati kako ćemo i odakle platiti. Ima jedan problem, spomenut je u izvještaju i ja zbilja ne znam kojim putem to krenut rješavati. Hidroakumulacija Modrac. Ja sam učio, pošto smo imali i elektrane da je prednost hidroelektrana, između ostalog, hidroakumulacija da izreguliše vodotokove, prihvata velike padavine pa da nema poplava, a kod nas je sa Modracem potpuno obrnuto. On prihvata sve što može prihvatiti i onda kad bude gusto pusti sve što može pustiti, a dole šta će biti sa Gračanicom, sa Doboj Istokom sa Isowudom, petim, destim, to neka oni brinu i nikom ništa. Ja zbilja ne znam je li to država u državi, kome oni odgovaraju. U čijem je sastavu je li to vodoprivredno preduzeće, ali za ove prve poplave, kaže čovjek da je bio u subotu naveče gore, hoće oni ispuštat vodu nisu uopšte počeli, da bi onda ispustili i da bi bilo ono što je bilo. O kolikim se sredstvima radi ili nisam dobro čuo ili je gospodin Džindo napravio previd, čini mi se da ste rekli 150 klizišta, pa minimum 50.000,00 KM zahvat po komadu, pa sam ja čuo da je to 750.000,00 KM, ali to je 7.500.000,00 KM, znači to je samo da se nešto odradi i onda nam je jasno i šta će biti po pitanju naših apela prema višim nivoima vlasti, ali je sasvim sigurno da je ovo problem države Bosne i Hercegovine, a ne Općine Gračanica. Mi znači sad moramo imati listu prioriteta, a po meni je to, ako je autobus dolazio u neki zaseok da mora opet dolaziti. Ako je oštećen glavni cjevovod da se to mora napraviti, a sanacija klizišta, evo sedam i po miliona maraka.”

Hasan Puškar je replicirao:

“Ja mislim da nije na mjestu ovo za ongažman. Ovdje imamo predsjednike VMZ-a i mi znamo s čime se susrećemo. Znači mi što imamo, imamo svojih sredstava, mi ćemo to nije problem, angažirati, krčiti ali ja kažem šta naredba tamo može. Tema nije molba, znači ja odgovaram kad angažujem nekog od ljudi da kosi, to ljudi rade, a nisam mu naredio, nego se dogovorio i rekao mu šta da radi, znači neko mora platiti. Ja samo pitam, ako nema ništa znači ja te ljude ne mogu platiti i ja te ljude neću ni angažovati, jer ja ne mogu stajati iza toga. Druga stvar, ja kažem pitao sam ovdje konkretno, možda se nismo razumjeli. Ja se obratim u Općinu, ovaj pet godina proširuje svoju bašču, pet godina proširuje u potok. Hoće li neko sutra doći angažovati recimo “Roading” d.o.o. koji će iskrčiti taj potok, napraviti i proširiti kako je bio u

prvobitnom stanju i tu fakturu tom građaninu ispostaviti. A ja se obratim u inspekciju, onaj mi kaže daj odluku, ja na Vijeću donesem odluku i pošaljem je i mi se tako dopisujemo pet godina, a rijeka poplavlja. To sam pitao konkretno i de da poduzmemo korake i jednom krenemo konkretno. Ako sam to ja, onda prvo krenite od mene pa onda idite dalje. Ja govorim za Soko. U mene u Sokolu toga ima, svi svoje bašče proširuju u potoke i evo kad se dese belaji onda pričamo i pred očima imamo to, eno kroz Pašaliće, radilo se i radi se i dalje a niko ništa ne poduzima ni danas dan. Idemo konkretno po redu i kad dvojicu, trojicu kaznimo neće više nikad to raditi. Ja samo skidam teret sa predsjednika VMZ-a ništa drugo. Oni su najgore prolazili u svemu ovom.”

Sead Gazibegović:

“Nisam ja uopšte Hasane mislio da ti trebaš i da si ti ovlašten da najteraš ljude da rade. Ovo je rečeno u kontekstu ovog što je rečeno, kako se odnosimo prema prirodi, dobro nam vraća. Prema tome, jasno je meni da niko ni od vas niti bilo ko drugi može natjerati ljude da izađu da rade. Ta su vremena očito prošla kad su bili neki mehanizmi koji su ili mogli namoliti ili natjerati ili nekim metodama to riješiti, tako da ovo ništa nije bilo upućeno tebi konkretno.”

Vehid osmanović:

“Ova informacija sadrži jedan veliki dio elemenata, ali ona je u potpunosti nepotpuna. Evo nekih 150 klizišta, ja dajem garanciju da samo u Gornjoj Orahovici koja otprilike ovdje zauzma 1/3 svih klizišta, ima minimalno 150 klizišta. Meni je žao što ja dolazim iz MZ-e koja je najugroženija po mome saznanju, a ja ne znam šta se dešava u drugim MZ-a, ali znam da je ubjedljivo najviše oštećena. Ja bih ovaj puta se zahvalio Civilnoj zaštiti koja je čak i u pola noći došla gore i zajedno s nama obilazila neke lokacije gdje je jedna porodica potpuno iseljena, a preko 30 domaćinstava ugroženo sa prekidima putnih komunikacija. Ondje nismo ni imali vremena da obidemo sve lokacije koje su zadesile nepogode, poljoprivredna zemljišta, voćnjake itd. Borili smo se isključivo ugroženošću objekata i putnih komunikacija. Po ovoj informaciji je to negdje 720.000,00 KM, ali mislim da ni jedan milion za Gornju Orahovicu neće biti ni približno dovoljan da se sanira ono kako bi ljudima omogućili putne komunikacije, a da ne govorim o dvije kuće koje su propale. Jedna koja sigurno se više nikad neće ni pustiti u funkciju, gdje je žena iseljena i vjerovatno se do kraja života neće vratiti jer sanacija samo toga po mojoj procjeni košta negdje oko 150.000,00 KM. To je u Mehićima, vjerovato ste gledali slike na internetu, tako da imamo zaista jedan veliki problem i mi smo se ovih dana borili isključivo da omogućimo ljudima da mogu koristiti kola hitne pomoći, za ne daj Bože, da se neko razboli, da maknemo onu zemlju koja se pojavila jer se već klizište aktiviralo i zatvorilo praktično već dva ulaza za Dobrnjiće. Jedno je potpuno potonulo i mislim da trebaju desetine hiljada maraka za njegovu sanaciju, a drugo koje je uzbrdo, drugo klizište je poklopilo tako da je zemlja izašla na put. I evo sad trenutno je to prohodno ali bojim se da će već sutra trebati ponovo intervenisati jer pola metra otprilike je na sat u prvoj fazi se to klizište kretalo. Preko četiri stotine kubika zemlje je do sada i izveženo, a šta će se dalje događati niko ne zna, kako će ovo vrijeme i dalje djelovati. Po mojoj procjeni je izuzetno mala procijenjena šteta na zemljištu. Ovih 45.000,00 MK je zaista neka mizerna cifra koja stoji i mislim da su stavili i deset puta više bilo bi malo. Ovo što su ljudi individualno pretrpili štete, neki usjevi su totalno uništeni neki će upoloviti ono što se očekivalo, tako da možda ta komisija treba nastaviti rad jer još uvijek nije prekinuto ovo vanredno stanje i treba obići i one ostale. Ja sam evo komandantu Civilne zaštite dao, jer mi imamo i lokalnih nekategorisanih šumskih puteva ili puteva prema njivama koje do sada niko nije pregledao a to su ogromna klizišta. Ti ljudi su sad odsječeni od tih svojih parcela totalno. Znači nema pristupa šumama i njivama a to su hiljade dunuma zemljišta i tamo su nekakve cifre veće a ovde se kaže 45.000,00 KM na makadamskim putevima što je po meni takođe izuzetno mala cifra za sanaciju da bi bar traktor ili kola mogla proći, jer ako to ne saniramo štete će biti još veće, a zemljište i šume propadaju još gore. Ima još jedan problem u ovim mukama kojeg sam dva puta sam uočio zajedno sa građanima iako se veliki broj ljudi u Gornjoj Orahovici samoorganizovao, ali kad im

je došao zort. Nije to bilo preventivno, nego kad su vidjeli da je to došlo njihovim kućama. Ne bi mogao reći da je to sad bilo da se spriječi nego da se zaustavi dalje propadanje. Ovdje bi mi trebali možda na nivou Općine obezbijediti jedan dio sredstava da ove lokalne nekategorisane i druge puteve ipak neko održava, jer ova naredba je jednokratne upotrebe. Ja naredim danas da neko možda očisti i prokopa neki kanal itd. ali to treba sistematski raditi. Mi možemo reći koji su to putevi koje moramo održavati i svake godine pročititi kanale, angažovati mašine jer najveći probemi tih klizišta su, čini mi se, ove vode koje nisu usmjerene sa svih novoasfaltiranih puteva ili ranije asfaltiranih, ljudi koji su začepili te kanale i kanalizacije. Jer evo, baš u Donjoj Orahovici ja sam prošao i u jednoj situaciji autom umalo nisam potonuo. To je kompletna dionica puta pod vodom i znači tu kanalizacija nije riješena kako treba ili odvodnja. Evo ja ne bih više pametovao i mislim da se moramo uhvatiti u koštac sa ovim problemom, da moramo malo i savjest građana staviti na jedan viši nivo da oni znaju da ako oni sami sebe ne zaštite neće ih niko zaštititi, ni Općina, ni Kanton a ni država. Ali oni idu čini mi se na pogrešan način, zaštite svoj objekat i vodu bace na sve druge strane i naprave katastrofalne štete na sve drugo. Ja kao predsjednik podržavam Izvještaj, ali ovo je samo djelimična procjena šteta.”

Midhat Alić:

“Zahvaljujem se predsjedavajućem Općinskog vijeća koji je pozvao sve predsjednike VMZ-a da prisustvuju ovoj sjednici i da zajednički rješavaju i zauzimaju stavove po ovom pitanju. Mislim da bi u narednom periodu trebalo da ovo pređe u praksu i da ona najbitnija pitanja koja su u okviru programa rada Vijeća i koja se odnose na budžet, treba da na takvim tačkama i takvim sjednicama prisustvuju i predsjednici. Mi imamo nekoliko njih ovdje, većina nije ali dobro je da i oni drugi shvate koji su to problemi s kojima se susreću ljudi koji rade u MZ-i sa građanima. Mislim da ovaj izvještaj koji je uradila odgovarajuća služba je pravovremeno urađen i ja bih u prvom redu odao zahvalnost Civilnoj zaštiti i ljudima iz odgovarajućih službi Općine Gračanica koji su reagovali brzo i mislim da se nikad ne može, a evo to je govorio i gospodin Džindo, da preko noći dođe do odgovarajućih promjena na terenu. Prema tome sve to ako se ne bude u jednom dužem periodu pratilo, normalno da ne može biti konstatovano da je tako. Ja podržavam većinu ovih diskusija o kojima su govorili moji prethodnici. Ja bih nešto još samo kazao vezano za ovu tačku 7. a to su mjere za otklanjanje posljedica ovih šteta. Mislim da je ovo dokument koji ostaje trajno u arhivi i mislim da bi ga trebalo malo drugačije koncipirati. Sve ovdje do ovoga pasusa jedan, dva, tri četiri koji govori o Općinskom štabu civilne zaštite. Mislim da bi odatle trebalo da se govori o odgovarajućim mjerama. Sve ovo dotle su konstatacije koje ne mogu ući u ovo, mislim, i ja ovo govorim u cilju poboljšanja teksta. Prvi zaključak, odnosno mjera koja treba da stoji i da se ovo vijeće pozabavi je to da prioritete u sanacijama objekata koje treba sanirati da bi se uspostavili normalni životni tokovi, treba sagledati, treba procijeniti koliko je to, a to su u prvom redu putevi, vodovodi i ugroženi stambeni objekti. Općina Gračanica nije u situaciji da sanira i obezbijedi milion i četiri stotine hiljada KM. Prema tome ja bih predložio da se, a to su i prethodnici govorili, da ovo vijeće na osnovu tih prioriteta da ovlaštenja načelniku Općine da, ovo o čemu ste vi juče raspravljali, zaduži Općinu Gračanica za sanaciju ovoga ili da to donese Općinsko vijeće. Nešto ću se malo zadržati vezano za konstataciju da su ove poplave pokazale sve nedostatke i propuste. Dobro bi bilo, a to bi nam sigurno koristilo kad bi mi evidentirali čiji su to propusti, jesu li to propusti institucija i kojih, koje su vlasti, koje su građana. Ne možemo mi građane iz ovoga izdvojiti. Oni su tu među prvima, osim dragog Allaha koji to donese. U Miričini je brdo postojalo iznad puta Doboj-Tuzla i prije ovoga. Put Doboj-Tuzla postoji trideset godina, ali sve dotle dok ljudi nisu zatvorili kanale, nije toga bilo. I tamo gdje je to tako regulisano ništa se nije desilo. Prema tome, neće doći gosp. Bajić da meni čisti dvorište ili da se obraćam načelniku. Ja sam prvi taj koji treba to i u svojoj njivi i u svom dvorištu. Prema tome želim da kažem da je to prvi zaključak vezano za ove prioritete a druge bi poredao ovako. Da kantonalni i općinski štab civilne zaštite, vezano za režim ovog ispuštanja vode, zatim federalne inspekcije. Zatim da bude zaključak ovo ispitivanje zemljišta, četvrti da se zatraže sredstva da to ispitivanje plati neko

drugi i šesto apel, odnosno zahtjev i traženje sredstava od viših nivoa institucija, Kantonalne i Federalne vlade. Ja se još jedanput zahvaljujem ljudima koji su danonoćno u ovo nekoliko dana radili na ovome.”

Suljo Mehanović:

“Čekajući na svoj red za diskusiju već sam dosta stvari čuo, pa se ne bih ponavljao. Sa ove govornice bih samo napomenuo da u ovom slučaju gledajući dugo, trebamo slušati struku i nauku za to rješenje problema, a u ovoj situaciji mi kao Općinsko vijeće, od kojih ljudi očekuju već sutra, ustvari očekivali su još juče a ne sutra, ili za mjesec dana, prioritete. Prioriteti svi znamo šta su. To je prilaz domaćinstvu, prilaz privrednom i stambenom objektu. Ako Općina nema, a znamo da nema sredstava, složio bih se sa ovim što je rekao prethodnik Midhat, da li je to zaduženje, ja bih to ostavio neka bude zadnje, ali da damo ovlasti i zaduženja načelniku da može internom preraspodjelom sredstava, mehanizmima koje zakon dozvoljava urediti ovo ako nedostaje novca, a to zaduženje neka bude neka zadnja stvar jer koliko god to bilo novaca ovaj problem se neće riješiti. Ovo je minimalno da bi ljudi živjeli normalno, bez obzira na to što se već sutra može desiti nova katastrofa. To bi bilo nešto najjednostavnije i što ćemo ustvari morati uraditi ali ne puštati njemu da to bude samo njegova glavobolja, nego glavobolja ovog vijeća, ovih građana i nema sada veze to ko je uzrokovao problem, nego da to bude ovlaštenje njemu za preusmjeravanje sredstava, ako postoji ta mogućnost i mehanizam, a neko novo zaduženje neka to bude krajnja mjera i jedan od zaključaka sa ove sjednice.”

Senad Memić:

“Očito je da je stanje vrlo teško a posljedice nakon svega ovoga su katastrofalne. Većina mojih prethodnika je navodila uzroke i posljedice ali mislim da se svemu tome ima još nešto dodati. Ja bih se, prije svega osvrnuo, a neki su već pričali, o neodgovornom ponašanju kako privrednih subjekata tako i drugih mnogih u smislu uzurpacija i svega ostalog. Ja mislim da toga definitivno mnogo ima na općini i jedan od zaključaka sa današnje sjednice bi morao biti da se uputi Kantonalnoj upravi za inspeksijske poslove i Federalnoj upravi za inspeksijske poslove u smislu da vodoprivredni inspektori moraju doći na područje naše općine i uzeti aktivnog učešća zajedno sa općinskim službama u smislu uzurpacija, odnosno uzurpiranja vodotoka. Takođe u smislu odnosa pojedinih institucija prema ovom nevremenu, ja ovdje moram spomenuti jedan primjer koji se ponovio dva puta u roku od dvadeset dana i gdje bi posljedice bile, da Općina nije intervenisala, katastrofalne. To je firma Elektroprenos koja je zadužena za distribuciju električne energije, gdje je čitavo područje ispod trafoa bilo poplavljeno i gdje je maksimalnim angažovanjem nekoliko preduzeća spašeno, jer u onom momentu da je došlo do nestanka struje oni ne bi došli sedam dana. Štete za građaničku privredu bi bile katastrofalne. I drugi puta kroz deset dana ponovila se ista isutacija . Ulaganje koje bi oni imali je maksimalno tri do četiri hiljade KM, da oni jednostavno sebe zaštite ali to ne rade. Isto tako imamo i danas pojedinih građevina. Bio sam na licu mjesta u Pribavi i definitivno je ljudski faktor uzrokovao da je poplavilo čitavo dvorište i pola kuće. Prema tome, mislim da puno više učešća maraju uzeti inspeksijski organi u svemu ovome jer ja zaista ne vidim da će se doći tobe, kao što narod kaže. Sljedeća stvar, definitivno je štete su procijenjene, one su u ovom izvještaju ali gospodo Vlada RS-a je izdvojila dvadeset i nešto miliona interventno i podijelila općinama. Mi smo dobili 10.000,00 KM od Kantona i 10.000,00 od Federalnog štaba, koliko ja vidim dvadeset hiljada KM. Po riječima godspodina Džinde to nije dosta ni za pola malog klizišta. Prema tome uz sve ono što mi možemo uraditi, evo bilo je prijedloga da li kroz rebalans, da li kroz zaduženje Općine, da li preusmjeravanjem sredstava unutar budžeta, imamo sredstva za unaprjeđenje poljoprivrednog zemljišta, ali mi nemamo šta više unapređivati. Spreča je poplavila sve dole i nema definitivno više ništa. Ta sredstva i to jedan od zaključaka takođe bi mogao biti da se sredstva unutar budžeta, namijenjena da li za unaprijeđenje poljoprivrednog zemljišta, da li iz eko fondova, da li sva ona sredstva koja bi bila u normalno vrijeme usmjerena negdje u neke korisne stvari, sad moraju ići ovamo. Ja ću potencirati još jednu stvar, a to je malo Sead

elaborirao. Hidroakumulacija Modrac je zlo za Sprečko polje. Ona iz godine u godinu, a sad i iz sedmice u sedmicu pokazuje vrlo nisko stručno rukovanje tom hidroakumulacijom. Ja pozivam nadležne organe u Općini da razmotre, da li ima osnova za podizanje tužbi. Takođe, Udruženje poljoprivrednih proizvođača, inženjera i svega ostalog bi se definitivno moralo uključiti u taj proces, ja stvarno ne znam dokle će to. Jedna rečenica na zadnjoj stranici ovog drugog izvještaja je alarmantna situacija koja kaže da po povlačenju vode ostaje bijeli trag i talog te miris karakterističkih hemijskih produkata. Gospodo draga, izgleda da nas neko truje. To je za mene možda i alarmantnije od pojedinih klizišta. Nije slučajno kad imamo izvještaje i domova zdravlja pa vidimo tamo masovno povećanje raznoraznih bolesti. Mislim da i u tom smislu mi trebamo malo više reagovati a ne samo od slučaja do slučaja, kad ribe pomru dole u Spreči. Očito je, i tu smo se svi složili da u narednom budžetu puno značajnija sredstva moraju biti predviđena za ove stvari. Mi smo svi manje više lokalisti kad se usvaja budžet, de da budžetska rezerva bude 50.000,00 KM, jer time upravlja načelnik, šta će to njemu. Neka je ona prediđena 3% ali može ona biti i 50.000,00, a sada da u budžetskoj rezervi ima 3% to bi bilo 330.000,00 KM pa bi ta sredstva se u nešto usmjerila, a sad ih nema. I zato kažem, svi smo manje više ovdje u vijeću odgovorni. Ja nakon ovih svih diskusija predsjedavajućem predlažem da napravimo pauzu da zajedno sa načelnikom, mislim da bi trebali malo sve ovo sanirati i predložiti određene zaključke koje bi ovo vijeće definitivno trebalo usvojiti.”

Mustafa Hrvic:

“Mi smo ovdje izrekli niz konstatacija i dobro je da se to čuje jer uvijek je dobro da se čuje šta ljudi razmišljaju i šta ih muči. Kao vijećnik, znači podržat ću ovaj materijal ovu informaciju. Ona takva kakva je i bar sa stanovišta ovdje gdje ja najbolje znam, u Piskavici, gdje sam ja predsjednik VMZ-e, to je urađeno dobro i to je ono na što mi gore nemamo primjedbi. Dalje napomenuo bih samo jedno. Ako je u mene umro otac ili umro mi komšija ja nemam namjeru prestat i živjeti jer to je jako ružno, to vodi ka suicidu. Prema tome, ono zaduženje od juče na Vijeću je sasvim normalno. Jer je to prioritet bio, znači u dvije godine i provlačili ga i prebacivali ga da se to završi, da dovedemo sve ljude u istu poziciju što se tiče tog dijela, jer ne možemo mi sad zbog nekih elementarnih nepogoda obustaviti sav život, nećemo se ni školovati, nećemo ići na muziku, ni na što samo se bazirati na to. To je za mene jednostavno i to je branjenje svojih stavova malo neprincipijelno i ne treba biti na to osjetljiv. Ja jesam za to, pošto je načelnik najodgovorniji, svi mi ovdje možemo diskutovati ovako ili onako, ali krajnje kad povuče, najviše njega boli glava i on će izaći i to objasniti. Ja jesam za to ako postoji mogućnost da se napravi zaduženje i u tom pravcu ali samo u dijelu da se infrastruktura i ostalo osposobi da ljudi normalno mogu komunicirati. I nije tačno da se građani ne mogu angažovati, to nije tačno. Znači, znamo da sredstava u Općini nema, a to što su doznačena su toliko malo da možemo reći da ih nema. Sredstva koja bi trebali očekivati odozgo od države, znamo da ih nećemo dobiti, evidentno je. Jer ako mi dobijemo tih 500.000,00 KM, isto kao da i nisi dobio s obzirom koliki su troškovi. Ja bih tako diskutovao. Znači mi se moramo isključivo osloniti na svoje snage. Primjera radi, ja popravljam kamion za koji nemam računa, ako nemam bacit ću ga u smeće. Prema tome ako sedam i po miliona košta ovo sve što je klizište i ako popravka nekog puta, ja govorim sad evo reći ću u Piskavici, košta mene 300.000,00 KM i ako ja za pedeset mogu zaobići to klizište, ja ću tog momenta što nemam para zaobići to klizište i napraviti put. Ima i takvih rješenja, znači da se izbjegn timer troškovi. I to ćemo i uraditi vjerovatno na jednom mjestu gore kod mene da to napravimo. Znači mi ne možemo čekati da neke stvari riješimo, možda će i doći novci, nekakvi, izvjesni. Znači mi se u MZ-u moramo vratiti i reći od Općine na raspolaganju je 10.000,00 nije 20.000,00 KM, jer ovih drugih 10.000,00 KM nije doznačeno. Nema rada dok nema para, pogotovo danas kakav nam je taj sistem vlasti. Dok ne dobiješ u džep nema ništa sigurno. Znači imamo 10.000,00 KM na raspolaganju, dovoljno za kafe ovim ljudima koji hodaju po terenu jer ljudi imaju pravo da se osvježe, jer treba da završe posao, a samo toliko imamo para za klizište. Znači sve pada nama građanima. Treba vidjeti koliko se građani mogu uhvatiti džepa, kao što su se hvatali i za ove puteve. Kad tu sve saniramo i vidimo šta je preče,

onda će sami građani reći moglo bi ovo ovako ili ovako, tako da ćemo doći do prave slike i do pravog novca, onda ćemo znati da li ćemo problem riješiti, koliko ga riješiti i možemo se onda koristiti našim stručnjacima u smislu da djelujemo interventno, koliko je to moguće ili da i to malo režemo ako je i to moguće, jer mi nemamo drugoga izbora. Kad se nekom pokvari auto, on za dan nađe pare da ga popravi da je u voznom stanju i onda konta kako će pare vratiti, naknadno konta. A ovdje mi kad trebamo rješavati zajedničke probleme onda mi to prepuštamo recimo Vijeću, načelniku i najdirektnije vlasti, a mi bi prekrstili ruke, a građanin ovdje kao osnovni činilac mora podnijeti teret, pogotovo kad su u pitanju nepogode. Sa stanovišta Civilne zaštite, sve je satkano da građani nose teret, a mi hoćemo da nam funkcioniše Civilna zaštita bez građana i bez njihovog učešća, znači to ne može. Prema tome ovaj teret moraju snijeti građani i u tom pravcu moramo voditi politiku, a mi ćemo se angažovati maksimalno i pomoći građanima. To je moj prijedlog.”

Džemal Jukan:

“Evo moram replicirati kolegi Titi. Juče jesmo raspravljali ovdje i zadužili Općinu nekim sredstvima gdje uz rješavanje ovih prometnica u centru grada još tri komunikacije su stavljene kao prioritet da se riješe, i što kaže, pored onih sredstava koja su planirana u budžetu. Juče je na dnevnom redu bila i ova tačka pod rednim brojem osam, a evo zaduženje o kojem pričamo je bilo pod rednim brojem jedan. Da nismo izdvojili ovu tačku i održali ovu tematsku sjednicu, vjerovatno juče ne bi imao niko prijedlog za nova zaduženja. Danas kad vidimo ozbiljnost ovog izvještaja i kad vidimo kakva je situacija na terenu, mislim da evo bez suzdržanih svi bi podržali da se zadužimo bar toliko koliko smo se juče zadužili. Tako da hoću da kažem da imamo kriterije u dvadesetčetiri sata različite. Ja sam to rekao i juče da je bilo, diskutovao bih kako diskutujem i danas, a evo danas se većina slaže s tim, tako da mislim da smo juče prioritetno uz centar čaršije gdje smo rekli da to mora, ne može ovako, i na kraju smo rekli ne mogu ljudi izaći na izbore po ovim putevima, ali evo već danas dolazimo u situaciju da nam treba puno više nego juče.”

Edin Šehić:

“Ja sam ovo zamislio danas da će ići drugim tokom, s obzirom da sam juče prisustvovao i na sjednici Općinskog vijeća. Mislio sam konkretno da će se ovdje nešto iznijeti, nekakvi prijedlozi i nekakve stvari koje bi mogle voditi bar urgentnom nekom rješavanju. Vidjeli smo opsežan izvještaj, ja sam ga uspio malo prelistati. Hvala Bogu u MZ-i Babić nemamo nikakvih značajnijih šteta, a hvala i ljudima koji su omogućili da budu dobro urađeni putevi i propusti tako da nismo imali nikakvih problema, osim dionice puta prema Visu gdje imamo problema, nažalost, sa ogromnom količinom vode koja ide čitavom dionicom puta i stvara kratere do 60 cm, ali evo ja već duže vrijeme pregovaram i dogovaram sa općinskom izvršnom vlašću da pokušamo riješiti taj problem i da pokušamo usmjeriti te vode, jer uzrok tih obilnih količina vode i jesu pojedina klizišta koja se pojavljuju u Čalićima i ispod Visa. Ja sam ovo zamislio da svi predsjednici VMZ-a iznesu glavne neodložne situacije. Znači, da vidimo šta urgentno možemo uraditi. Da bi to sad, pošto smo već odmakli u diskusiji, možda da načelnik sa proširenim sastavom gdje bi bili prisutni i gospodin magistar i šef Civilne zaštite, da pozove predsjednike VMZ-a koji će iznijeti zaista neophodne stvari, neophodne probleme, kao što je presječen put ili ne znam, ugrožen objekat i ako mi budemo čekali sredstva od viših nivoa vlasti mi nećemo ništa uraditi. Vi to znate kao općinski vijećnici da mi nećemo imati pomaka. A šta ako bude, ne daj Bože, za deset dana, ili sutra ponovo nepogoda pa i ova klizišta koja su krenula pa i ovi putevi koji su pretrpjeli ogromna oštećenja, ako naiđu još neke bujice, šta onda. Znači mi ovdje ništa konkretno nismo ni donijeli ni predložili. Ja smatram da načelnik treba sazvati sastanak i to već sutra da predsjednici VMZ-a na osnovu ove informacije podvuku tamo ono što je kod njih urgentno što se mora riješiti. Kolega Hasan nije tu, ali ja mislim da ima dobrih ljudi koji će uzeti učešća jer je to svih nas. Znači, ne treba gledati uvijek samo nešto da se plati. U MZ-i Babići ja tražim od Općine samo da plati materijal, znači gdje ja ne mogu to isfinansirati a uvijek će se naći dobrih ljudi koji će se založiti da se nešto napravi za opšte društveno dobro i korisno. Takođe predlažem, kao što je kolega Vehid rekao da za održavanje puteva pokušamo nešto

sistematski riješiti u toku cijele godine, kao što je recimo zimsko održavanje puteva. Zašto ne bi Općinsko vijeće, evo i izvršna vlast potpisale te ugovore preko VMZ-a gdje bi se imenovao nadzorni organ koji bi rukovodio time da se spriječe začepjenja ili ne znam te stvari koje možemo blagovremeno preduhitriti te obilne kiše i padavine da ne dođe do ovakvih katastrofa, znači da se pokuša to u budžet ubaciti. Normalno, ne možemo mi sad neke ogromne cifre ali da pokušamo to sistematski riješiti da tokom cijele godine imamo otvoreno, da predsjednici VMZ-a mogu ugovoriti sa izvođačem koji će to uraditi. Imamo sad u budžetu neka neznatna sredstva, ali ja prvi, ako je tamo 1.900,00 KM, razvlačim to maksimalno, za ne daj Bože, ako nešto ispadne, da li ću moći pokriti te troškova, ali da ima nekakvo plus, minus, gdje možemo u interventnim situacijama i više sredstava potrošiti. Znači, kao što sam rekao, za MZ-u Babići takođe očekujem i uporno se zalažem da riješimo napokon taj pristupni put prema platou Visa. Svaki puta nasipamo, trošimo ogromna sredstva poslije svake jače kiše, ponovo imamo istu situaciju i evo spreman sam, ako mognemo napraviti neku komisiju koja će izaći koja će snimiti situaciju i dati neki prijedlog da se to malo dugoročno riješi.”

Enes Ahmetbašić:

“Ja ne bih dugo, samo primijetio sam kod iščitavanja ovog izvještaja da ni u jednom periodu nije uvršteno, naše prijave o oštećenjima i klizištima. Ono što se u prvom izvještajnom periodu desilo to je već i sanirano, to je već Muharem na vrijeme izvijestio i to je regulisano. Ali evo ja sam 24. 06. 2010. godine uputio jedan dopis Štabu civilne zaštite i bio sam svaki sat u kontaktu sa gosp. Nedimom gdje sam ga izvještavao ali za ono što sam ja mogao da vidim. Međutim, ja ovdje hoću da kažem i malo kritike na račun vijećnika iz VMZ. Evo dolazeći na sjednicu dobio sam i kritiku i pitanje, praktično sasvim umjesno od vijećnika, kako nije sve izviješteno, kako sve nije uvršteno u izvještaj o štetama i klizištima na području MZ-e. Ne može samo očekivati od građana, ali ni sami vijećnici nisu imali nikakvog učešća. Jednostavno samo nazovu telefonom i pitaju zašto se ne sazove Vijeće da se razmatra a po čemu da se razmatra. Ja samo znam o tri slučaja i prijavio sam to Štabu civilne zaštite. Ja tek 24. 06. 2010. godine dobijam od vijećnika neke podatke da se u tom njihovom dijelu gdje su oni odgovorni, jer ne mogu ja niti bilo ko hodati pored njegove kuće. Znači oni su bili dužni da podnesu izvještaj kako bi mi blagovremeno mogli da uputimo jedan dopis, izvještaj prema Službi civilne zaštite. Pa vjerovatno mi smo malo i zakasnili sa ovim svojim izvještajem i on sigurno zbog toga nije uvršten, obzirom da je to bio izvještajni period 21. 06. i 28. 06. mi smo to predali 24. 06. i evo ja ću to poslije i predate lično komandantu Štaba, a faksom sam i poštom već poslao. Znači samo tražim da se ovo uvrsti u izvještaj i da se sve ostalo odrađuje prema prioritetu.”

Mujo Hasić:

“Neću ništa novo reći, sve je ovdje manje više već rečeno na konstataciju koja kaže dijagnozu se zna, a lijeka nema. Imamo znači za posljedicu klizišta, odrone, poplave itd. uzrokovane vremenskim neprilikama i ljudskim faktorom. Koliko je ko u tome učestvovao sad je teško procijeniti a i ne trebamo. Međutim, ja se jako dobro sjećam da su i ranije ljudi kroz svoje njive kopali jarkove i usmjeravali vodu na određena mjesta. Sad jednostavno niko više ne da vodu u svoje a voda ne može ići uz brdo nikako. Prema tome ljudski faktor je jedan od glavnih aktera za ovo što nam se nažalost desilo. Ja ću nešto drugo da pokušam a vezano je za akumulaciju Modrac. Znamo da općine Jablanica i Mostar imaju godišnje naknade i budžet od nekoliko miliona maraka po osnovu hidroakumulacije. Jedino hidroakumulacija Modrac koja se koristi, između ostalog i za potreba Termoelektrane Tuzla, jedino od te akumulacije i od Termoelektrane Tuzla, Tuzlanski kanton i općine nemaju nikakve koristi, osim velikog aerzagadenja i ovih poplava koje su konstantne, nažalost. Zato predlažem da mi ovdje donesemo u formi zaključka da uputimo apel ili zahtjev i pokrenemo neki proces da jednostavno Elektroprivreda BiH izdvaja određena sredstva za sanaciju eto nažalost, šteta, ako ne možemo nešto drugačije uraditi. Ako znamo da je dobit elektroprivrede oko sto pedeset miliona maraka ili stotinu, to uopšte nije ni bitno. Znači smatram da mogu koji miliončić izdvojiti i za sanaciju bar

ovih šteta ako to ne može biti neka naknada u kontinuitetu. Mi sad moramo samo napraviti prohodnost puteva jer mi ne možemo dovoditi u prijašnje stanje nešto za što nam treba nekoliko miliona koje nažalost nemamo, ni mi niti ih ko ima, a ne znam da li iko zna kako ih namaknuti, a evo i ovih 300.000,00 KM zaduženja možemo reći nećemo, neka ovi ljudi u gradu hodaju po blatu i da ih uštedimo, ali zašto. Nizašto, jer ove probleme nećemo riješiti a ovdje će ostati takvo stanje. Zatim, mi znamo da je u općinskom budžetu konstantno plaćanje obaveza prema bankama, poreza i doprinosa prema državi, plate uposlenika i paušali vijećnika. To je samo konstanta, da bi se budžet punio manje za 20% ili prebačen za 20% iako imamo neku štetu mi samo mislimo da li će nam Općina, Kanton ili Federacija namiriti. Koliko smo mi sposobni da kažemo kako ćemo mi učestvovati u tome. Ako nećemo uzeti alate i motike i ići tamo jarkove kopati, onda evo imamo vijećničke paušale pa da mi pokažemo znake dobre volje i kažemo, imamo deset, plus deset od Federacije, pa ćemo i od nas mjesečno, cirka 50.000,00 KM. Gdje smo mi tu, jer mi izgleda samo znamo imamo milion maraka manje u budžetu trenutno a naši paušali isti. Imamo štete od poplava sedam miliona maraka, sedam i po a u nas paušali isti. Ovo govorim jer nismo baš dobro u toj komunikaciji, bar tako ja mislim. Znači, i mi trebamo jedan dio da snesemo u vezi toga, ali samo uz znak dobre volje.”

Hasan Puškar:

“Moram replicirati što se tiče paušala. Mislim, izvini ali moram replicirati. Kad smo mi svoje mandate krenuli sa hajrom, je li tako, mi smo od svojih paušala izdvojili prve godine čini mi se trideset pet ili trideset osam hiljada da se povećaju stipendije, Odlukom smanjili, gdje je tih 38.000,00 KM, stipendije nisu povećane. Znači mi smo već učinili ali nije problem opet učiniti, ali da ne bi otišlo kao onih 35.000,00 KM negdje.”

Muharem Musić:

“Na ovu temu, Izvještaj o procijenjenoj šteti, ja ću podržati ovaj izvještaj sa prijedlogom mjera koje treba poduzeti i takođe bih zamolio, sugerirao bih općinskoj komisiji za procjenu šteta, odnosno Općinskom načelniku i Civilnoj zaštiti Općine Gračanica da ova komisija još ne završava svoj rad s obzirom da ipak nije sve evidentirano na terenu, da ima još tih šteta koje treba evidentirati, a naravna stvar, očekuje se da će se pojaviti još novih šteta za koje se nisu stekli povoljni uslovi. Ja ću u svojoj diskusiji da navedem samo jedan primjer i takođe ću da dam jedan prijedlog. Predsjednik VMZ-e Džakule Enes Ahmetbašić je to dotakao u svojoj diskusiji ali riječ je o šteti i intervenciji koja je bila prije 31. 5. i ona vjerovatno zbog toga, iako je dakle prijavljena, uredno dokumentovana se ne nalazi u ovom izvještaju s obzirom da ovaj izvještaj tretira period poslije 31. 05. 2010. godine. Na području MZ-e Džakule je na jednom lokalitetu došlo do odrona zemljanog materijala od rijeke do same ivice asfalta u dužini nekih četrdesetak metara. Ta šteta je nastala 19. 05. 2010. godine. 22. 05. dakle odmah u roku od tri dana ta šteta je sanirana. Ugrađeno je 19 m³ kamenih stijena, očišćeno je riječno korito i period poslije 22. 05. je tek nastupio, period kada su počele da se dešavaju prave štete. Ja ne smijem ni zamisliti šta bi se desilo da mi tu sanaciju nismo odmah uradili. Mi danas sigurno u ovoj dužini od 40 dužnih metara ne bismo imali asfaltnog puta, komunikacija prema Posavini bi bila prekinuta i naravna stvar sada bi ovdje pričali o štetama sigurno većim od pedesetak hiljada maraka. Kompletna ova investicija je nas koštala 2.925,00 KM. Radila je firma “Gramat” iz Gračanice. Jedan dio ovog računa je plaćen. Ako se nekako ne snađemo platit ćemo i ovaj drugi dio sredstvima građana jer ipak riječ je o našoj putnoj komunikaciji koja je za nas izuzetno važna i koja nas povezuje sa Posavinom, Hrvatskom i dalje sa Srednjom i Zapadnom Evropom. Dakle ipak ima smisla na vrijeme se organizirati i preventivno djelovati kako bismo zaustavili veće tragedije i veće štete. Što se tiče prijedloga smatram da sada imamo izuzetno dobru šansu da definitivno nakon svih ovih šteta kažemo, odnosno da ova komisija dakle na osnovu ovog izvještaja i stanja koje je snimila na terenu, izdefiniše koje od ovih šteta su proizvod ljudskog nemara, ljudskog faktora a šta je nastalo djelovanjem više sile na koju mi kao pojedinci, kao društvo i kao vlast, Općina, nismo mogli uticati. Te rezultate do kojih ta komisija dođe predlažem da obavezno budu

prezentirani svim VMZ-a kako bi na osnovu tih rezultata i tog novog izvještaja mogli da se organizuju i na vrijeme preduzmu odgovarajuće mjere zaštite, kako ne bi došlo do ovakvih šteta koje se nalaze navedene u ova dva izvještaja od strane općinske komisije za procjenu šteta na području općine Gračanica.”

Ibrahim Hasić:

“Nisam mislio izlaziti ali da neko ne misli da u Malešićima nema klizišta. Ovom informacijom je prilično dosta obuhvaćeno ali nisu obuhvaćena sva klizišta u MZ-i Malešići i to jedno ključno nije obuhvaćeno gdje su tri kuće blokirane ispod poligona malih sportova. To je jedno od prvih klizišta bilo. To nije obuhvaćeno i nije obuhvaćeno nekoliko klizišta na putu Malešići-Stjepan Polje, preko Ahmića. Što se tiče faktora i uzroka klizišta u Malešićima, najnovije je ljudski faktor. S obzirom da evo ja već deset godina pratim ta zbivanja u Malešićima, a klizište 2001. godine je bilo na putu Malešići-Kalesija-Lukavica. To je klizište ispod kuće na glavnom putu. Ono je bilo 2001. godine međutim, bilo je i 2000. godine, odnosno i 1999. godine u Kalesijama, dole gdje je isto neprohodno kao i na putu Malešići-Lukavica. Znači to su paralelno jedno pored drugog klizišta samo su jedno sto metara po vertikali razdvojena. Znači to su podzemne vode nema ljudskog faktora. Ovo treće po redu klizište, a ustvari ono je i najbitnije, škola-Golaći ispod farme Salić Kadira i kuće i ekonomskih objekata itd. To se sad ispostavilo da je jedno od žešćih klizišta jer su bili odsječeni, ustvari Golaći su već odsječeni, to je trećina Malešića. Ali juče je u 12.00 sati pušteno to klizište u promet i tone. Bilo je vrlo jednostavno ga sanirati, nije trebalo puno ali već tone kako su krenuli autobusi itd. S obzirom da na tom klizištu prema Golaćima baš se ukršta i kanalizacija sa tim oštećenim dijelom i tu niti se može uraditi kanalizacija bez puta, niti put bez kanalizacije. Ja sam, što se tiče same kanalizacije, a evo tu je i magistar i bit će sigurno neke konsultacije, ja sam gosp. Osmana Čajića izveo jer tu gravitira negdje oko 50 domaćinstava a ponavljam, koja prolazi ispod oštećenog dijela puta, sa dvije strane dolazi, znači zaposjednuto je kompletno područje klizišta. I moje lično gledanje na ovo je, Izvještaj je urađen dobro još da ima para dovoljno, a sreća je što nisu problem pare, bit će ih. Predlažem što se tiče Malešića da bi se osposobio jedan od ova dva neprohodna puta, jer jedan pravac se može osposobiti da bi se mogli na određen način građani koristiti, znači jedan, a ovaj drugi naravno usporedno sa kanalizacijom da ne bi došlo ponovo do nekakvih šteta.”

Općinski načelnik, Nusret Helić:

“Evo pozdravljam sve prisutne i evo dat ću neko svoje viđenje, dat ću neke odgovore u smislu da se malo pojasnimo, jer ovo je toliko složeno pitanje da ga ne treba posmatrati sa puno strana nego u smislu kako rješavati ovo što nam se desilo. Bilo je ovdje priča Gradačac ono, Tuzla ono itd. Reći ću ja i o tome nešto. Dakle ono što je zaista prisutno, stanje je stvarno složeno i o tome je i u Izvještaju rečeno i ovdje nikad gore kad su u pitanju elementarne nepogode na području općine Gračanica. Tako je slično i na drugim područjima, a o tome je govorio i magistar i zaista, zaista je takvo stanje i ja naveče sanjam da kiša pada, jer me je strah šta će se desiti. Obilazio sam teren i vidim zaista dođete u situaciju da ste nemoćni. Gledate u nesreću a nemoćni ste. Stanje jeste tako kako jeste. Ima niz razloga. Ne možemo mi sad reći ljudski faktor, ima svega ali valja doći do toga i tačno reći gdje je ljudski faktor, gdje je nešto drugo. Ovo je prirodna nepogoda, katastrofa, a je li ona uzrokovana ljudskim faktorom ili nečim što se dešava. Kad budemo to znali, lakše će nam biti i poduzimati određene mjere. Moramo ovdje mi reći šta je prioritetno, mi koji smo ovdje operativci i najodgovorniji, šta je prioritetno i odakle to prioritetno sanirati. Morat će to biti dakle sredstva Općine, sredstva građana, sredstva viših nivoa vlasti, šta je to dugoročno i sistemski jer mi moramo za mnoga od ovih klizišta, govorim sad o klizištima jer su manje štete od poplava i kad znamo tako sistemski i šta raditi, valja raditi projekte, pa iz tih projekata će se znati kojim sredstvima i gdje i kako možemo raditi. Evo rekosmo para nema nigdje ali kad uradimo ovo što mislim da sistemski treba raditi onda treba raditi jedno po jedno. Nemojte vezati ono juče sa ovim danas. Džemo je to iznio, ali

nemojte. Možda ćemo mi kad ovo sad budemo rješavali jedno po jedno, a znate da smo dali naloge i jedno 6-7 firmi naredbe da počinju sanirati. Kad budemo znali iznose bit će to daleko više nego što je Gradačac izdvojio 100.000,00 KM. Ja vam tvrdim da je naša općina već potrošila preko 100.000,00 KM u sanacijama. Dakle, nemojte da iznosimo šta je ko izdvojio i je li to puno ili ne. Evo ja ću sutra vama predložiti vanrednu sjednicu i reći da ćemo naći 200.000,00 KM za klizišta šta smo uradili, možda će trebati tristo ili petsto tako da saniramo ono. Zbog toga vas molim, ovo je složeno pitanje, vidim da ste odgovorni svi. Mogli bi do sutra pričati kakvo je stanje, ali moramo stvoriti u smislu da nešto poduzmemo. Ovo ko će platiti. Puškar kaže nema para. I ja kažem nema para. Trebamo stati na tome. Ne treba, treba tražiti rješenja i gore unutar Sokola među ljudima, ne u smislu para, nego u smislu odgovornijeg odnosa. Meni je sad najlakše reći vama imamo u budžetu 15.000,00 KM za klizišta, imamo tamo ona namjenska sredstva još 40.000,00 KM i to je 55.000,00 KM. Ja ne smijem ništa drugo potpisati. Ako hoćete tako imat ćemo to što imamo, ali ne, odgovorni smo svi zajedno i mislim da ćemo se razumjeti kad budemo razriješili ova pitanja ključna, prohodnost puteva, pa kažemo dalje, onda ćemo svi. Evo da ne odgovaram na mnoga pitanja, dakle zaista je stanje složeno, idemo u prioritete, mi već znamo koji su prioriteti. Slažem se da treba dopuniti, ali moram vam reći da su tri ekipe i morate to prihvatiti da su ipak brzo uradili ove prve preliminarne izvještaje o klizištima. Logično je da ima ovih novih jer svaki dan se mijenja, ali vjerujte tri ekipe po tri čovjeka, tri auta, ne rade se drugi poslovi, vanredno je stanje i nije to tako lahko. Nemamo mi stručnjaka, oni su izašli i konstatovali. Niko od njih ne može ni dati uputu. Zato smo angažovali ljude koji su odgovorni, pokušamo da nam daju rješenja u kom pravcu ići, jer ne može tamo. Ja sam izašao u Vranoviće jer su ljudi tražili u osam naveče i šta ću ja davati rješenje. Došao da se isplaćem sa ljudima i da kažem da ćemo nešto poduzeti itd. Ja mislim da u nekom pravcu trebaju ići zaključci, normalno da ćemo najviše potegnuti mi, jer evo vidite koliko je vremena prošlo, poslali smo izvještaje, vlada ni jedna ni druga, ni Federalna uprava ne reaguju. Reaguje sa 10.000,00 KM mi smo htjeli vratiti onaj dan, sramota nas bilo, 10.000,00 KM, a već smo mi bili uložili 50.000,00 KM itd. Evo ja ću vam predložiti pa da možda u pauzi i prokomentrišete neke od prijedloga. Prvo, jeste ovo konstatacija da je zaista stanje katastrofalno, nikad teže, i sa stanovišta broja oštećenih objekata, ugroženog stanovništva i infrastrukture, procjene visine šteta itd. Takođe ova konstatacija da su sredstva planirana za ove namjene zaista minimalna. U ovom momentu nema mogućnosti za povećanje, treba tražiti, mi smo i tražili pomoć sa svih nivoa vlasti u saniranju posljedica jer oni imaju, ako ništa veće budžetske rezerve i sredstva. Ova sredstva sa kojima raspolažemo moraju se uložiti u prioritete, a prioriteti su komunikacije. Dakle, sa ovim sredstvima sa kojima raspolažemo valja obezbijediti prohodnost puteva a prema mogućnostima i sredstvima pripremati već projekte sanacije i dugoročne sanacije klizišta. Ovo što mi uradimo, evo desilo se u Golaćima u Rašljevi. Mi smo intervenisali, napravljena je prohodnost za dva dana, sutra je još metar leglo zemljište i s time ćemo biti suočeni sve dok ne budu projekti, dok ne bude bušenje i struka rekla to je to. Da budemo svjesni i mi i u tumačenju građanima jednostavno smo svi ekipa, da ne tumači neko to je načelnik, idite tamo njemu on će to itd. Sljedeće evo može biti zaključak da tražimo od naših poslanika na svim nivoima vlasti da se zaista založe kod ovih tamo gdje jesu, da se izdvoje veća sredstva za ove namjene, uključujući donošenje nekih odluka za sredstva koja su namjenska bila za neke, evo ja sam spremio sredstva za naknadu za poljoprivredno zemljište. Spominjemo vodne doprinose, ekološki fond, jer iz tih sredstava treba sad ovdje prioritarno donijeti odgovarajuće odluke da bi se moglo intervenisati. Ovo smo pričali, evo i vi ste o Elektroprivredi, za mene ona mora izdvojiti sredstva za sanaciju posljedica plavljenja Spreče. Ma koliko nama trebalo, a treba ovo, treba neko namiriti štetu koju stvori evo Mujo je pričao o Elektroprivredi. Treba nam hidroelektrana, to je uredu, ali nesreće i posljedice koje ona izaziva mora neko platiti. To je isto i ovdje i to izgleda samo može kod nas, nigdje drugo. Dakle, u tom smislu da ide zaključak prema gore. Ovo što smo govorili MZ-e i građani, vi znate da je bilo i ranije, hajde da napravimo akciju, jer evo ja sam išao putem za Vranoviće, novi put pa je sve zaraslo, maltene do pola puta i ne znam još negdje drugo, ama baš niko ne reaguje. Uredu je i putna služba i sredstva, ali vi znate koliko imamo sredstava i koliko

bi trebali dati. Moraju se i građani uključiti, ako niučem drugom u zaštiti ovih novih puteva i u zaštiti svog zemljišta, kanala nigdje nema. Sva klizišta u poljoprivrednom zemljištu su rezultat, između ostalog i to što voda nije odvedena, nema kanala itd. Ovo vijeće mora tražiti, a mi smo pisali prema nadležnim direkcijama i jednoj i drugoj, da kroz inspekcijski nadzor i mjere, kad su u pitanju ovi zatrpani kanali pored puteva. To je poseban problem u Orahovici. Orahovica je poplavljena ispod tako zahvaljujući lošem stanju, nema propusta, zatrpani su i u tom smislu da tražimo intervenciju. Evo spominjali smo budžet naredne godine, očito da nam treba planirana veća stavka kad su u pitanju elementarne nepogode, daj Bože da ih ne bude, pa ćemo ih na drugo usmjeriti. Treba nam veća budžetska rezerva. Ona i jeste za nešto što je vanredno, što se može desiti itd. pa ako bude prilike, zavisi od kretanja budžeta u narednoj godini i prihoda da pokušamo planirati da nam se ne bi desilo ovo što se desilo. I logično, pričali ste puno vi iz Sokola, ali morate dati vi signal. Mi smo u Orahovici bili i vidjeli na dva tri mjesta, neko je kriv, vidjeli smo na terenu, što je voda izlila, ali mora odnekle doći inicijativa da bi ljudi izašli, logično da treba, a i to je sistem da treba sve one koji su doveli do sužavanja vodotoka, do uzurpacija i zna se ko rješava uzurpacije ima imovinsko-pravna služba i očito da moramo svi signale iz VMZ-a gdje su sad ključni problemi. Uzmite koji su sve vodotoci i da mi to riješimo za godinu, dvije, tri, nema šanse, ali ključne problemske tačke, slobodno evo kad dođe zahtjev do načelnika, ako treba i do službi intervenisat ćemo jer zaista više nema smisla ovo trpjeti, jer drugi trpe zbog nečije megalomanosti i slično. Ja mislim da su to ovi zaključci koji su mogući uz ono da moramo prioritete rješavati sad, jer evo kad je neko spominjao nadležnost načelnika da vuče neke konce. Mi smo već sad ušli u neko, uslovno da kažem, ne zaduženje, dali smo naloge ljudima da rade a nemamo ta sredstva, ali ćemo ih naći, možda ćemo pregovarati sa izvođačima za odgodu jer to je takva situacija da i oni moraju shvatiti, da na taj način jedino sad možemo ovo rješavati. Toliko.”

Predsjedavajući Vijeća je konstatovao da nema prijavljenih diskutanata, te predložio pauzu od petnaest minuta ali je prije pauze Hasan Puškar zamolio da iznese kratak zaključak.

Hasan Puškar:

“Kao predsjednik VMZ-e redlažem, nemora se usvojiti ako se neće, da nam se bar dio sredstava onih koje imamo tamo odobrenih, ili da donesemo fakturu ili da angažujemo građane za što imamo odobrena po hiljadu, dvije po petsto KM, ne znam ni ja koliko da nam se isplati ili nakon donešene fakture kod računovodstva da se plati.”

Data je pauza od petnaest minuta.

Nakon pauze nastavku sjednice prisustvuje 26 članova Vijeća jer je sjednicu napustio i Hasić Mujo.

Rahim Gadžić je iznio sljedeće:

“Nakon ove pauze i konsultacija sa Klubom, pošto je Klub vijećnika SDA bio inicijator ove sjednice, mi bi predložili jednu konkretnu stvar, to jest da se danas donese odluka da Općinsko vijeće donese odluku da se Općinskom načelniku da na raspolaganje u visini od 200.000,00 KM, a da ćemo u rebalansu budžeta iznaći tih 200.000,00 KM u okviru usvojenog budžeta, kako bi se izvršile hitne sanacije puteva, da bi se obezbijedio normalan saobraćaj prema svim mjesnim zajednicama, i još jedan prijedlog da ona sredstva koja su planirana za održavanje puteva po mjesnim zajednicama, to su jako mala sredstva, da se na neki način isplate MZ-a ili da MZ-e to ulože u održavanje ovih puteva poslije poplava i tražim da se Vijeće o tome izjasni.”

Predsjedavajući Vijeća je naglasio:

“Mi Rahime imamo jedan sličan zaključak u ovom materijalu, pa prvo da čujemo i ostale prijedloge, mada nisu navedeni nikakvi brojevi iznosi i ne znam ima li sada smisla da sad nešto kažemo koliko je to. Ali evo da prvo čujemo prijedlog zaključaka pa onda da razmislimo na tu temu.”

Zaključak je pročitala Zehra Mujačić, sekretar Općinskog vijeća.

“Prihvata se Izvještaj o procijenjenoj šteti od prirodne nepogode koja je uzrokovala pojavu poplava i klizišta na području općine Gračanica u periodu 31. 05. do 11. 06. 2010. godine i u periodu od 21. 06. do 28. 06. 2010. godine uz stavove:

- da komisija nastavi rad kako bi evidentirala nastale štete koje nisu obuhvaćene ovim izvještajem,

- budžetska sredstva planirana za elementarne nepogode i druga namjenska sredstva iz budžeta uložiti u sanaciju prioriternih putnih ravaca uključujući mogućnost odgođenog plaćanja,

- od viših nivoa vlasti tražiti donošenje Odluke za obezbjeđenje finansijskih sredstava za sanaciju nastalih šteta,

- zahtijevati od JP “Spreča” Tuzla da izdvoji i doznači finansijska sredstva za sanaciju šteta od poplava u Sprečkom polju,

- od Kantonalne i Federalne uprave za inspekcijske poslove tražiti da se angažuje nadležna vodoprivredna inspekcija u cilju regulacije i zaštite vodotoka korita rijeka,

- u budžetu za 2011. godinu planirati veća sredstva za preventivne mjere i sredstva za otklanjanje posljedica prirodnih nepogoda kao i veća sredstva budžetske rezerve.

Muharem Musić:

“Evo to su prijedlozi stavova u zaključku, a o samom prijedlogu Kluba vijećnika SDA kojeg nam je Rahim predočio.”

Rahim Gadžić:

“Zaključke koje ste vi pročitali, ponovo se spominje na odgođeno plaćanje, nova zaduženja Općine, mi smatramo u Klubu SDA da se može iznaći za hitne sanacije sredstava u okvirima budžeta za 2010. godinu. Znači izmjenama budžeta za 2010. godinu, što mi kažemo rebalansom budžeta se mogu iznaći ta sredstva. Mi smo juče donijeli jednu odluku gdje smo cementirali 330.000,00 KM. Nisu samo tri četiri projekta u budžetu, ima više projekata i kad smo juče pitali kakva je njihova sudbina, niko ne zna hoće li se realizovati, neće ili šta će biti i sada još da mi odemo u novo zaduženje u 2011. godini pa hoćemo li i jedan projekat imati u 2011. godini. Zbog toga ja se ne bih složio s tim u zaključku da se ide kod izvođača na odgođeno plaćanje jer smatram da se može u okvirima tog budžeta pronaći ta sredstva.”

Rabija Fišić:

“Pošto mi nije jasno ja bih samo da pitam, je li u to uvrštena i poljoprivreda? Znam ja sve, sanacija puteva, ali ima li tu šta za poljoprivredu da se planira?”

Sead Gazibegović:

“Nisam od početka bio u kreiranju ovih zaključaka, pa i ovo sad što Rabija postavlja pitanje, ustvari je ono što sam ja na početku govorio. Mora se utvrditi lista prioriteta imenom i prezimenom. Prioritet, putni pravac taj i taj, za poljoprivredu toliko i toliko i gotovo, to mora biti jedan zaključak i morala bi neka komisija proširena ili ova ista proširena sa nekim stručnim licem, to uraditi. Ta lista prioriteta neće normalno biti zakovana, jer svaki dan se može pojaviti nešto čega nema nikako, pa će skočiti na prvo mjesto. Morali bi imati nešto na papiru, da to ne bude samo ovako, dosta je uopšteno. Znači na osnovu ovog izvještaja kojeg imamo, koji je dobar. Prošli puta sam ga zaboravio pohvaliti i zahvaliti ljudima koji su to radili u ovako kratkom periodu da bi se napravio jedan vrlo lijep pregled ovih vrlo ružnih stvari, ali mislim da bi morali uz taj izvještaj imati sad to, da stoji to, to, to, a u nekoj kasnijoj fazi i koliko je to sredstva.”

Općinski načelnik:

“Ne mislim, obzirom na ovakvo stanje, da možemo ovako razgovarati, 200.000,00 KM i hoće li tu biti poljoprivrede. Prvo mi ne znamo sa kojim sredstvima raspolazemo. Evo da kažete vi danas da je to 200.000,00 a rekli ste da su prioriteti putevi, a putevi kao prioritet budu

300.000,00 KM, gospodo šta ćete? Ja ću stati na 200.000,00 i nema prohodnosti i nema poljoprivrede. Dakle idemo u sanaciju puteva, mi saniramo a drugo su štete i naknade štete. Kad dobijemo i znamo šta ćemo dobiti od viših nivoa onda ćemo imati cifru. Ja bih se sad zahvalio svima kad bi dobio 100.000,00 KM, a neko je spomenuo 500.000,00. Vidjet ćete, onda možemo govoriti o nadoknadi štete. Tako da ovo što smo rekli odgođeno. Nemam ja sad 200.000,00, nema budžet tih para sad, zato smo rekli uključujući i odgođeno. Ako mi uspijemo do kraja godine platiti to uredu je, ali valja čovjeku reći, situacija dolazi sada, a platit ćemo ti sljedeće. U tome je priča. A ja imam osjećaj da je ovdje opet neko nepovjerenje, kao, načelnik će to negdje tamo. Šta vam je ljudi. Sredstva namjenska, a rekli ste da moramo sanirati puteve. Mogu biti sto, mogu dvjesto, mogu petsto. Meni je draže kad vi kažete do dvjesta i mi gore saniramo Rašljevu i još nešto za dvjesto i stanemo i nismo uradili. Namojte se bojati ljudi, mi smo ovdje odgovorni, da neko tamo to nešto hoće. Prioritet je prohodnost pa su onda štete. Ja znam da ima štete na poljoprivredi, na objektima, znam da neko nema, namještaj mu otišao, ali ima sve jedno po jedno. Nemamo dovoljno para a ne znamo ni koliko ćemo imati para od ovih gore. Zbog toga ja govorim i mislim da je ovo prirodnije da kažemo u granicama pa i dogovora odgođenog plaćanja i sasvim normalno. Evo da pojasnim, jer je stanje stvarno složeno. Najlakše je sad načelniku reći nema para i niko mi ništa ne može. Nemam ja pravo potpisati ako nema para, ali evo vanredna je situacija, držimo se toga i vjerujte učinit ćemo sve i više nego što bi neko drugi jer smo odgovorni ljudi i živimo s tim problemom. Samo bih vas zamolio u tom smislu da to ne bude dvjesta jer možda će faliti, ili da možda kažemo spram potreba. To je to ako govorimo o zaduženju, moramo jer ako nemamo para, a hoćemo sanirati i ući u obavezu iz nekih tamo sljedećih ponuda.”

Rabija Fišić:

“Jesam li pomenula poljoprivredu, načelnik me uvijek zalijepi. Mislim stvarno, nije mi krivo načelniče, nema veze. Međutim, ja samo želim da ako idu mjere neka se tu kaže da je i poljoprivreda uključena. Nisam ja rekla ništa za ovih 200.000,00 i neka ide za puteve, ali u mjerama da se uključi i poljoprivreda.”

Senad Memić:

“Mislim da su zaključci koji su pročitani ovdje prihvatljivi, a i ovo što je predložio Klub vijećnika SDA u principu se odnosi manje više na isto. Nas rebalans po svoj prilici stvari čeka i mislim da je ovaj zaključak prihvatljiv da se odobri načelniku da rješava prioritarno stvari, a prilikom razmatranja rebalansa budžeta mi ćemo svakako voditi računa o ovome i ukoliko mogemo u tome naći određeni prostor da pokrijemo, pedeset, osamdeset, sto, dvjesto hiljada u rebalansu, naći ćemo. Ali ako i ne nađemo pošteno je to ljudima reći da će ti projekti moći biti plaćeni u sljedećoj godini. S te strane otprilike, mislim da je to jedna cjelina i ovo što je rečeno od SDA i ovo, nisam za to da se ograničavaju iznosi i zaista su ovi zaključci prihvatljivi, jer se na istu stvar odnose, tako da mislim da je ovo prihvatljivo za sve nas.”

Općinski načelnik je replicirao:

“Mislim da nije korektno ovakvo istupanje, čim načelniku se spomene poljoprivreda on reaguje. Recite sve za poljoprivredu. Ja samo govorim realno, a rekli ste svi koji ste diskutovali da je prioritet, komunikacije, ako nisu recite. Ako ne reknete drugo ja ću postupiti ovako da su komunikacije i radit ću na tome. O tome koliko poljoprivreda, ne možete mi Vi govoriti jer ja znam koliko i šta radim. Prema tome, nekorektno je reći, čim se spomene poljoprivreda načelnik to nešto ima protiv. Niti sam kad ima, niti ću imati, niti se tako ponašam.”

Muharem Musić:

“Ovi zaključci, dakle, koje je sekretar Vijeća pročitala su proistekli iz svih onih diskusija koje smo imali u prethodna dva sata od kako smo počeli sa sjednicom Vijeća. Nije niko govorio o konkretnim novčanim iznosima, za ovo ili za ono, uglavnom pokušali smo da definišemo šta je to što trebamo pod broj jedan raditi. Otprilike smatrali smo da je to, da su to ovi potezi koje smo

naveli u spisku ovih zaključaka. Ja bih takođe predložio da se ovaj spisak zaključaka proširi sa još jednim, a to je da Civilna zaštita i nadležna općinska služba na prvoj narednoj sjednici Općinskog vijeća, koja je planirana za avgust mjesec, da informaciju šta je realizirano od svih ovih zaključaka kao i plan daljnjih aktivnosti na saniranju šteta koje su nastale od poplava i klizišta na području općine Gračanica, u drugoj polovini maja mjeseca i u junu mjesecu. Dakle, da na avgustovskoj sjednici bude prezentirana informacija o realizaciji ovih zaključaka sa planom daljnjih aktivnosti na sanaciji evidentiranih šteta.”

Ibrahim Hasić:

“Što se tiče prioriteta, sasvim je normalno, treba ići po prioritetima ali uz komisiju općinsku, odnosno općinsku, mještovito Civilna zaštita da obavezno budu predstavnici, odnosno predsjednici ili njihovi izaslanici uz tu komisiju i da se na određen način određuju prioriteti. Evo ja konkretno govorim za Malešiće. Ja u Malešićima imam bukvalno tri klizišta i blokada je, samo se u Gračanicu takoreći može ići, ali ova dva se moraju riješiti, jedno ne mora do nekog daljnjeg vremena, a naravno ja znam prioritet, koje je to od tih klizišta prioritetnije i samim tim znači, da obavezno bude predstavnik VMZ-e zajedno sa tom komisijom.”

Predsjedavajući Općinskog vijeća je naglasio da se ovaj prijedlog može navesti u jedan od stavova. Kratko je obrazložio i prijedlog Kluba SDA, naglašavajući da je Općinski načelnik najavio rebalans za avgustovsku sjednicu, kada bi se razmatrala i ova informacija o realizaciji, tako da bi se paralelno i u aktivnosti rebalansa definisala sredstva koja su neophodna za saniranje svih ovih šteta koje su nastale tokom kišnog perioda na području općine Gračanica. Na kraju je zamolio Klub SDA da malo razmisli na temu da se ne ide ni u kakve iznose sredstava, pošto se ni ne zna koliko će to koštati i koliko će biti sredstava moguće obezbijediti.

Rahim Gadžić je u ime Kluba vijećnika SDA zatražio pauzu od pet minuta radi konsultacija svih članova Kluba vijećnika SDA.

Data je pauza, a nakon iste nastavku sjednice prisustvuje 26 članova Vijeća.

Rahim Gadžić je iznio stav Kluba vijećnika SDA:

“Nakon obavljenih konsultacija mi ćemo iznijeti svoj stav. Pošto mi danas odlučujemo o privremenim sanacijama šteta na putevima i klizištima i smatramo da će se uraditi projektna dokumentacija i nakon toga možemo sazvati pomnovo još jednu sjednicu na kojoj ćemo odlučivati da li su veći iznosi ili nisu, a za privremenu sanaciju mi smatramo da je dovoljno sredstava da se obezbijedi prohodnost puteva u sve MZ-e u tom iznosu. Znači ne radimo mi sad rješenje klizišta ovdje ili ondje na putu tom i tom, betoniraju se potporni zidovi, a ne može se raditi bez projektne dokumentacije, mi vršimo samo privremenu sanaciju da se omogući prohodnost puteva do svih MZ-a. Mi smatramo da je to u tim granicama i da se u okviru budžeta može naći taj iznos za privremenu sanaciju i to u iznosu od 200.000,00 KM.”

Muharem Musić:

“Što se tiče ovog prijedloga, mi imamo budžet, on je takav kakav je i imamo budžetske stavke. Između ostalog, imamo budžetsku stavku za saniranje posljedica elementarnih nepogoda. Tako nam piše u budžetu. Ovaj sada prijedlog, ja ne znam da li ga možemo na ovakav način, zaključkom intervenirati na budžet. A evo imamo i šefa Službe za finansije, imamo i načelnika, svi smo ovdje u sali. Da li mi možemo na ovakav način zaključkom intervenirati na već usvojeni budžet ili moramo prije toga ranije staviti tačku dnevnog reda, novi materijal koji je rebalans budžeta za 2010. godinu, pa onda jednom takvom odlukom, jednim takvim aktom prepravljati situaciju u budžetu Općine Gračanica za 2010. godinu. Smatram da ovo što je navedeno u ovim predloženim i pročitanim zaključcima se isključivo odnosi na ona sredstva koja već postoje u budžetu, koja su već odobrena i otvoreno je na neki način da je moguće, ukoliko bude bilo potrebno napraviti angažman na odgođeno plaćanje, a onda bi u tom slučaju imali obavezu kada

budemo informirani na avgustovskoj sjednici Vijeća o realizaciji ovih zaključaka, rebalansom budžeta izvršiti tkz. peglanje budžeta zbog sredstava koja su utrošena na ovakav način, za sanaciju ovih šteta koje su nastale u prethodnom mjesecu. Dajte molim vas, da još razmislimo da nam se ne desi situacija da mi usvojimo jedan ovakav zaključak, a onda se ispostavi da ga jednostavno ne možemo realizirati jer Zakon o budžetu ili neki drugi zakon koji određuje način utroška budžetskih sredstava nam se ispriječi i kaže, e ne može to tako i onda nam blokira čitav ovaj naš posao koji smo danas ovdje uradili i pokaže se da smo uzalud potrošili ovo naše vrijeme od nekoliko sati.”

Rahim Gadžić.

“Gospodine predsjedavajući, Vi hoćete jednim zaključkom da omogućite da se može ići kod dobavljača, zadužiti se, a mi tražimo da se donese jedna odluka. Znači, odlukom ne možemo, a zaključkom možemo, pa mi nejasno. A napraviti ćemo je sad ako treba.”

Mirnes Ahmić:

“Evo samo da pitam predsjedavajućeg, a šta u slučaju da se zadužimo kod dobavljača, a ispriječi nam se Zakon o dugu i zaduženju u Federaciji BiH. Šta ćemo onda?”

Senad Memić:

“Mislim da ovo malo previše umotavamo, ove formalne stvari, a ja ne vidim svrhu jer mislim da idemo u nekakvom pozitivnom tomu rasprave, a da se sada ne nadmudrujemo ovdje ko je pametniji, ko je ne znam, obrazovaniji što se tiče ovog svega. Ja tražim da mi ovdje nađemo rješenje i mislim da su otprilike ovi zaključci u smislu pronalaska rješenja sanacije prioritetnih pravaca i omogućavanje ljudima da dođu kući i da živa i rade. Prema tome, ja zaista mislim da ova rasprava, meni se čini, ne vodi nigdje, ili da se više izjašnjavamo o svemu ovom ili da predsjedavajući vidi i da sjednemo interno mi iz kolegija i ponovo definišemo zaključke, ali stvarno nema smisla više raspravljati ovako.”

Mustafa Bajić:

“Ja se izvinjavam, međutim moram izaći. Mi smo jedini koji smo obišli sve ove lokacije. Znači prioriteta se vide iz ovog izvještaja. Putevi su zatvoreni. Tri puta prema Rašljevi, znači ona dva puta na tri lokacije su faktički onemogućena. Pa onda u Gornjoj Orahovici imamo prema Mehićima, i Dobrnjići gdje su putevi odsječeni. Malešići-Kalesije, gdje ljudi jednostavno nemaju izlaza da dođu do centra, do ambulante. U tom cilju mi smo već dali naredbu da se angažuje određena mehanizacija, a evo i Prijeko Brdo, odron je i više autobus ne može doći gore ako se hitno nešto ne uradi. Mi smo ušli, koristili smo ovlasti Štaba i Štab je donio naredbu da se angažuje preduzeće na hitnoj sanaciji, da mogu građani izaći ako ništa ljekar, da može otići kupiti brašno itd. Znači u tom dijelu mi smo dali naredbe, a ne znamo koliko će koštati i to ne zna niko. Ja mislim da ovdje ne treba sada pričati o nekakvim ciframa, jer prioritet su ljudi, zdravlje, život i ono najpotrebnije što treba da dobiju.”

Općinski načelnik:

“Evo me, ako pitate ja ću raditi spram sredstava koje imamo. Dakle imamo 15.000,00 KM za klizišta, imamo iz ovih namjenskih sredstava, čekat ćemo kantonalna sredstva, imamo budžetske rezerve 40.000,00 KM i u tome ćemo raditi i završiti. Za mene je priča gotova. Ja sam predlagao rješenje, sve drugo i ako nam ko dođe, reći ćemo nemamo adekvatne odluke Općinskog vijeća. I to je istina. Kad smo rekli na moguću odgodu, sami ste juče pričali što se ne bi zadužili ako treba da popravimo put taj koji treba. Sad odjednom se nešto bojite i ne može se zadužiti, nešto iz nekih razloga. Dakle, to nepovjerenje prema radu načelnika i ovo što poduzima. Ja bih bio sretan da može, recite do sto hiljada ali da imamo sto hiljada i da je onda završena priča. Rahime, prije tri dana si me napao zašto niste ništa na kolegiju uradili da se napravi prohodnost puta Prijekom Brdu. Je li isitna? Znaš li koliko će to koštati? Ne može se

dobiti informacija dok se ne utvrdi. I zbog toga smo predložili ovo, jednostavno da izađemo. Predsjedavajući, može zaključak biti u okviru sredstava planiranih i mi ćemo raditi.”

Rahim Gadžić:

“Gospodine načelnice, nije da Klub vijećnika SDA nema povjerenja, a Vi prema nama niste nikad ni amandmana usvojili kad smo ga kandidovali prema budžetu i sad pričate kretat ćemo se u okvirima. Vi možete gospodine načelnice pripremiti rebalans budžeta i da mi intervenišemo prema građanima, jer postoji mogućnost da se obezbijede sredstva. I mi to tražimo, da vidimo u okvirima budžeta da izdvojimo sredstva jer smatramo i stojima na stanovištu da se mogu obezbijediti sredstva unutrašnjom preraspodjelom budžeta. To nisu toliko velika sredstva da ih ne možemo obezbijediti. Idemo na privremenu sanaciju dok ne dobijemo projektnu dokumentaciju i vidimo je li to milion i ako jeste idemo u zaduženje Općine.”

Džemal Jukan:

“Mislim da bi trebali privoditi kraju i mislim da je stvar pravne tehničke prirode, da li zaključkom se može dati ovlaštenje načelniku da se zaduži ili treba odluka. Znači kako se zove, je li zaključak ili odluka, da donesemo, ako treba odluka da donesemo odluku, a ako je zaključak, je li on pravno valjan da se to može raditi i evo ima struke neka kažu. Ovo što je predložio predsjedavajući, na sljedećem, vijeću koliko je urađeno koliko je utrošeno para, tad će biti rebalans i znat ćemo šta je urađeno u ovom periodu između dva vijeća, sumiramo to prvobitno koliko je to koštalo i treba li ići sad dalje i da li će trebati milion zaduženja ako se možemo zadužiti, a ovo neka ide da ne trpe građani i da vidimo karakter, naziv odluke, zaključak, šta je to da možemo ući da se ovaj posao realizuje i to u ovih narednih 7-8 dana tu prohodnost treba napraviti. Normalno da će se popraviti, sanirati, a ovo projekti, neki će biti teški možda i pola miliona maraka, koji će nekad doći na red vidjet ćemo. Ovo što je hitno mora se uraditi, napraviti i to ne treba limitirati ali imat ćemo informaciju koliko je to koštalo, koliko je utrošeno i šta još treba raditi.”

Hasan Puškara:

“Ovako mi do sutra možemo šetati. Hoćemo zaduženje. Koliko zadužiti. Sto hiljada, dvjesto, petsto ili milion. Znači ne možemo lupati napamet zaduženje neko, pod navodnicima. Normalno da će se sve sanirati i da se sanira, ali sigurno to ne košta više od dvjesto hiljada ili tristo, sad nije bitno koliko to košta. Ali ima neka cifra, dvjesto hiljada ne može biti, za deset dana sjednica i onda još petsto, nije bitno ali da se zna i da više ne ponavljamo, predsjedavajući daj te neke zaključke na glasanje, može, ne može i doviđenja. Normalno da se prohodnost puteva mora obezbijediti.”

Vehid Osmanović:

“Ja se izvinjavam što se javljam, možda nije ni red da kažem da ne trebate ovdje limitirati nikakve cifre. Znači, najveća je glupost ovdje ograničavati bilo koga da rješava ono što se mora riješiti. Mene danas ili sutra ako nazove Ahmo Dobrinjić i kaže opet je put zakrčen ja moram zvati Dedića ili bilo koga da pošalje mašine, jer trideset kuća je ugroženo i ne mogu ljudi nikako izaći. A to se može desiti i u Prijekom Brdu, Rašljevi ili bilo gdje drugo. Bilo kakvo ograničavanje sa ciframa je bespredmetno u ovom trenutku jer su ovdje u pitanju građani, znači nema ograničenja ni petnaest ni sto hiljada, jer tamo gdje moramo intervenirati naći će se pare, a i načelnik će se truditi da ih obezbijedi i tražit će mogućnost odakle. Ovdje se radi o ljudima i imamo porodica koje ćemo morati iseliti, a i njima treba smještaj. Do sada službe i načelnik rade dobro svoj posao, a dug je period dva mjeseca da se čeka sjednica.”

Hasan Puškar:

“Da ne bude ovo ovako, znam ja na šta se ovo svodi. Da otvoreno pričamo. O klizištima niko ne postavlja pitanje. Znam ja sad svi okolišaju ali nemojte sutra uz klizište, kada dođe

jedanaesti i dvanaesti mjesec i izvještaj, nemojte da neko, odnosno da se uz klizište ispruži puta tristo do četiri stotine metara. Normalno da se klizišta moraju sanirati, ali nemojte da dođemo ovdje za govornicu i neko izađe i kaže da se to desilo. Ne prijetim, ali kažem nemojte da se desi. Hoćete da se dogovorimo da bude neograničeno ali da to stoji u zaključku.”

Zajim Nurić:

“Evo ja ću nastojati da dam jedan mali doprinos u ovoj diskusiji. Prvo, gospodine predsjedavajući ja imam jednu primjedbu, trebao si da upozoriš prethodnog kolegu koji je diskutirao onako kako je diskutirao i evo sada ga ovdje nema, jer on obično tako kaže pa izađe. Ja bih ga pozvao da u svom izlaganju bude precizan. Da vidimo na koga on aludira. To je nekulturno i ponižavajuće, ali uvažavajući ovo vijeće neću reći neku težu riječ. I drugo, mislim da si ti precizirao zaključke s kojima smo se mi načelno složili i da ne bi mi ovdje dočekali sabaha, a što Vehid reče, ljudi čekaju, da se mi izjašnjavamo o zaključcima, a što će neko biti nezadovoljan to je druga stvar.”

Rahim Gadžić:

“Ja moram da kažem, nema tu nikakve sumnje što neko govori, ali nije evo problem mi smo uvijek bili za kompromise i danas dan smo. Evo gospodine načelniče, idite neograničeno sa sredstvima, uradite sva klizišta, a mi ćemo reći građanima da smo izglasali jednoglasno, načelniku smo dali ovlaštenje da će sanirati sva klizišta.”

Na ovu diskusiju Općinski načelnik je reagovao, jer on ne želi da ide takav zaključak.

Rahim je nastavio:

“Evo prijedlog dajemo, znači za privremenu sanaciju klizišta, gospodinu načelniku neograničeno da koristi sredstva i za putnu komunikaciju.”

Predsjedavajući Vijeća Muharem Musić:

“Prijedlog Kluba vijećnika SDA je malo prije Rahim formulisao i glasi:
- da Općinsko vijeće daje saglasnost Općinskom načelniku za neograničeno korištenje sredstava u cilju sanacije šteta nastalih na putnim pravcima na području općine Gračanica.”

Općinski načelnik je ponovo reagovao:

“Ja neću neograničeno. Neograničeno je i znači da mogu raditi šta hoći i kako hoću.”

Predsjedavajući Vijeća je zamolio Rahima Gadžića da ponovo definiše prijedlog Kluba vijećnika SDA.

Rahim Gadžić:

“Jasno je, znači na putnoj infrastrukturi da se sanira sve što se desilo, privremeno da se saniraju klizišta, i da se omogući svim građanima normalna prohodnost, neograničeno da načelnik koristi sredstva. I ne znam zašto negodujete kad mi kažemo neograničeno da koristi i da može sanirati svu infrastrukturu.”

Sekretar Zehra Mujačić je ponovo pročitala zaključak koji glasi:

“Budžetska sredstva planirana za elementarne nepogode i druga namjenska sredstva iz budžeta uložiti u sanaciju prioriternih putnih pravaca oštećenih klizištem, uključujući mogućnost odgođenog plaćanja.”

Predsjedavajući Vijeća je naglasio:

“Prijedlog Rahima Gadžića i Kluba vijećnika SDA je bio, da Općinsko vijeće daje saglasnost Općinskom načelniku da izvrši sanaciju, privremenu sanaciju oštećenja na putnim pravcima sa potrebnim sredstvima, sa neograničenim sredstvima.”

Prijedlog je dat na izjašnjanje.

“ZA” je glasalo 8 vijećnika, 4 “PROTIV”, a ostali “SUZDRŽANO”.

Prije izjašnjanja o zaključcima koje je pročitala Zehra Mujačić, Rahim Gadžić je zatražio pauzu od pet minuta.

Data je pauza.

Nakon pauze, a uz prisustvo 25 članova Vijeća Rahim Gadžić je iznio sljedeće:

“Pošto je Klub vijećnika SDA tražio ovu sjednicu, mi smo svojim diskusijama i prijedlozima pokušali da odredimo određena sredstva, vidimo da nema podrške, a poslije toga u kompromisu pokušajemo dalje da damo ovlaštenja načelniku za neograničena sredstva da se sanira putna infrastruktura na općini Gračanica, vidimo ponovo ne dobijamo podršku od vijećnika i smatramo da bilo kakav prijedlog SDA znači ovdje ne može proći, odnosno dobiti podršku, ali smo ponovo, hoću da kažem u interesu građana i kompromisa i svega mi ćemo ponovo podržati i ovaj izvještaj a i bilo koji izvještaj ako je u interesu građana, i smatramo da je i ovo u interesu građana i mi ćemo podržati zaključak.”

Predsjedavajući Vijeća je definisao šta se dodaje novo u nekim stavovima. Zaključak glasi:

Prihvata se Izvještaj o procijenjenoj šteti od prirodne nepogode koja je uzrokovala pojavu poplava i klizišta na području općine Gračanica u periodu 31. 05.-11. 06. 2010. godine i u periodu 21. 06. - 28. 06. 2010. godine uz stavove:

- da Komisija za procjenu šteta nastavi rad u saradnji sa predsjednicima vijeća mjesnih zajednica, kako bi evidentirala nastale štete koje nisu obuhvaćene ovim izvještajem,
- budžetska sredstva planirana za elementarne nepogode i druga namjenska sredstva iz budžeta uložiti u sanaciju prioriternih putnih pravaca oštećenih klizištem, uključujući mogućnost odgođenog plaćanja,
- od viših nivoa vlasti tražiti finansijska sredstva za sanaciju nastalih šteta od klizišta i poplava,
- zahtijevati od JP “Spreča” Tuzla da izdvoji i doznači finansijska sredstva za sanaciju šteta od poplava u Sprečkom polju,
- od Federalne i Kantonalne uprave za inspeksijske poslove tražiti da se angažuje nadležna vodoprivredna inspekcija u cilju regulacije i zaštite vodotoka korita rijeka,
- u budžetu za 2011. godinu planirati veća sredstva za preventivne mjere i sredstva za otklanjanje posljedica prirodnih nepogoda i planirati veća sredstva budžetske rezerve.

Služba za poduzetništvo lokalni razvoj i finansije na sjednici Vijeća u mjesecu avgustu, informisat će Općinsko vijeće o realizaciji zaključaka iz tačke I.

Zaključak je jednoglasno usvojen, čime je i završena tematska sjednica Općinskog vijeća Gračanica.

Zapisnik vodila: Mevlida Naimkadić.

Tonski snimak sjednice uredno je arhiviran.

Mevlida Naimkadić

PREDSJEDAVAJUĆI
OPĆINSKOG VIJEĆA
Muharem Musić